

OSUWELA NIIHIKU NANYU

NI MUTTHAKA AYA



Mooxeleliwa, apatthani. Nikhale neemenleene okathi vakhani paahi.

Muluku Oophenteya, okathi hiyo, mootthimakani nno ni weekeseya wa makhalelo, nineemelahu wa okathi ola vakhani wala ewoora, enakhaleru exeeni, Nyuwo munivahenryanyu, wira noovaheni nttotopelo ni ovuwa Yeenyu, wira nilaleye Masu Anyu, wira noosuweleni Nyuwo oratteene, mwaha wa yeeyo hiyo othukumannahu voosiis'ula. Hiyo ninnooxukhuruni Nyuwo, Muluku, okhala wira aakhala athu alikanne ni yiitthokinhe wira erwe yiiwe. Voohicala mukhalelo ni okathi, ni ole onkhalaahu, awo nlelo annaamini. Ni hiyo ninnooxukhuruni Nyuwo mwaha wa yaawo.

² Muluku, hiyo ninnooxukhuruni Nyuwo mwaha w'owerya Wanyu wuulupale wo ovoniha, anatiri a Masu Anyu. Moota murima ahu onvihiwaaya naaiwaka onamoona ola! Mithinto sothene sa mixankiho sinruuhiwaka wa aana a athu! Nyuwo, ni mahala Anyu ni owerya, nave ni natiri Anyu, muhaavoniha. Ni ari va, ehimyaka onamoona, emuttottopelaka Muluku. Hiyo ninnooxukhuruni mwaha wa yeela.

Nto vano hiyo, olelo, niiwe Mutthaka Nyuwo onivahenryanyu wa ewoora ela. Naasomaka mmasuni Mwanyu, Nyuwo munivahe yoochimya ya ele enrowaahu osoma. Otthuna Wanyu wiireye mwa itthu sothene, okhala wira ninvekela mwa Nsina na Yesu. Amen.

Mukilaathiki.

³ Oreeriwa okhala va voosiis'ula. Nkireere otteeliwa murima mwaha wa nyuwo othene. Ni Munna Wood, Munna Roy Roberson, axinna anci-ene akina, aavara muteko voororomeleya mahiku maili ookiserya, wira ehele ettheke yooreerihwa emp'ela wa niwoko nenla, okhala wira Ettiminku evinre yaahoonasa moota mwaahaaxeie anyu. Ni yaahikhalanasa musurukhu vakhani moosukani wa ekereja, nto awo khupacerya ovara muteko khurumeela yoowo wira yookhaliheni voowiitthyaala, ni musurukhu nyuwo muhenlyanyu mwa soovaha, wira nwerye okilaathi, mwiiwe Mutthaka. Vooriiryaxa olelo ovikana saaryaya. Tivo hiyo ninnimuxukhuru Muluku, ni nyuwo, mwaha wa mureerelo ola.

⁴ Ootteeliwa murima... Munna Roy Borders, owo otthunne okhala ottuli iwe voosiis'ula. Vano miyo khimuleela wira akuxe ekhatera awe akilaathi va n'arumeyi ala, masi owo

khuhitthuna. Ntoko nyuwo othene munsuwelanyu, Munna Borders onnithoonyerya vapuwani. Ninnitthapa okhalana Munna Borders ni hiyo, ni arumeyi anci-ene akina ni apatthani.

⁵ Woovirani wa esumana miyo—miyo kinnikhala kuupuwelaka, ni wira, “Kaphiya iwe, Ttiminku, kinoorowa omusuwela khula murumeyi, khula mutthu.” Nto mwaphiya va, munkhala oowaatta muteko ni Mutthaka mpakha munliyalanyu sothene, voohalela, siiso ele yaari.

⁶ Vano kihaana otthikela wArizona. Kihaana otthika Esekunta enrwa, esumana emosa, kitthikelaka oTucson, wira kaakuxe anamwane weiwo waaroiha oxikola. Ni kinootthika nto nuumala yeeyo. Ni amwaar’aka ahaana okhala weiwo voohilekela, wira epacerye...wira yaalepihe anamwane, isumana piili exikola ehinatthi opacerya. Ni miyo, nto, kinrowa otthikela wenno okathi vakhani.

⁷ Nto vano ola okathi aka wo wiitthyuuwa. Ntoko munsuwelanyu, miyo kinlaleya opacerya Dezembro; Janeiro, Fevereiro, Março, Abril, Maio, Junho, ni Julho. Vano, Muluku atthuna vale, ni ohikhala wiitthaniwa woomeekha, ola p’ukathi miyo—miyo—miyo kinkhalanaaka omumula waka, wiitthyuuwa waka. Kinoorowa oxaya. Nto miyo...

⁸ Vano Apwiya yakiitthanela etthu ekina, itthu iyo ti soohaanyiherya. Muluku okathi wothene t’opacerya. Ni kinthuna wira Owo okhale oopacerya, ni nyuwo muntthuna wira Owo okhale oopacerya. Masi nto waahikhale wiitthaniwa woolikana, ni yakhala otthuna Wawe, ti yeeyo kinrowaaka wira vano mwa miyeeri miili sinttharelana, orowa oxaya vano, wira kimumule. Miyo...

⁹ Nyuwo khamunuupuwelela, olumwenku khonkhalakhala osuwelaka, orinaaka ovira-mo. Munnona? Ni wuukhuleya wunci-ene. Khivanxankiha Apwiya yaahimeenryaya awiixutti Aya, okathi Awo yeettaaya ni yaawo, “Murwe epantte aya mothakoni, mmumule vakhani.” Munnona? Miyo kinnisuwelaxa eyo, khula nihiku, ni vanci-enexa okathi mahiku aka ankhalaxa oowaatta elapo ya vathi, moone. Vankhalaaka oowuuluvala, vannisuweleyaxa yeela. Nyuwo munimwiiwa pastore ahu airelaka “amen” yeeyo, nave. Owo, hiyo, ninoowerya osuwela wira khanihiyo amiravo vammalaahu ovira miyaakha miloko mithanu. Vano nihaana okhalana okathi vakhani.

¹⁰ Hiyo ninnixukhuru vanci-ene mwaha wa onamoona nimanlyahu wiiwa. Amwaar’aka yaari owannyawe Muhano Wood, nsana, okathi atthu amosa-amosa yaaruulyaya okhuma wAlabama, okhuma nipuro nlo wu, ni yaahimya itthu suulupale Apwiya yiiralyaya vamuthukumanoni vale, sa axinamwane ovonihiwa, ni itthu soohiyana-hiyana. Ni itthu sinci-ene, wulu, saamukuxa okathi munci-ene wira—wira sihimmwe.

¹¹ Nto nave-tho kihaaha wuupuwela wira...Kookupali wira akina aya aakileela wira Munna Larson muthiyana onoorwa va mwa isumana piili ni tutthu. Miyo nkisuwelanxe, masi kookupali wira ehimmwe wira aari musulu awe, khino, wira avahereriwe, omuruuhaka okhuma oChicago. Muhan'owo khonreereke onireerela murima, ni hiyo ninnimuxukhuru. Ni owo omuruuhale tutthu mmosa okhuma oChicago, wira ovahereriwe. Yeeyo, owo orina okathi vakhani wira amuruuhe, wona waka, wira ovahereriwe, masi owo oocaliwa wira mwaan'ola avahereriwe w'Apwiya. Tivo Munna Larson atthuna vale, kilavulaka, owo amuruuha-ru tutthu owo wira avahereriwe.

¹² Vano nto, khino, owo ailikanyihaka, Miyo—miyo kintthuna kihimye wira ola waari Mutthaka woolipaxa kitonko aka ophavela olikanyiha, mpakha nsana ohiyu. Moovirani wa esumana, kaanvolowa vasaala, wira kiphavele wiivalaaniha nuumala owaakhula oraami aka ni itthu, wira—wira kiphavele waakhela etthu mmuruni mwaka ya ewoora. Ni okathi waarowaaka, miyo—miyo nkaawerya hata...Muupuwelo aka waari woohikhala etthu. Ni, nsana, kaahirowa mporawuni. Miyo koono wira khuwaareere oviha, tivo kirowa mporawuni, khukilaathi mwemmo. Ni kaaniphavela omukuxa Bibilia aka ni omusoma, nto kaamurupa. Vano kaanvenya ni owurya maasi, ni ophavela wiivenxa, ni okhumela vate ni weetta vakhani, okilaathi vaxikattani.

¹³ Ookhala aavinre khukiphwanya kihivanre ekamisa, kikilaathe-ene vaxikattani; khuwaareere oviha. Awo yaahittikinya ntata. Nkaasuwenle sintoko yaattikinnye ntata... Mutthu, siiso khino aakhanle mutthu a wenna opooma, wala khino aari mutthu mukereja, aakittikinyenle ntata. Nto miyo—miyo kaamuupuwela saana, khwiiraneya miyo—miyo oweha ekaaro kaakuvaka, yaavira. Miyo khuttikinya ntata.

¹⁴ Nsana ohiyu kaahikela mukaaroni kirowa oCharlestown, kiphavelaka waakhela etthu. Apwiya, yaakhala ntoko, yaatthuna okileela etthu, masi miyo...Satana aaphavela okihaaxa, wira okikhootiherye wira. Tivo kuupuwela, "Ahe, owo aira yeeyo, miyo kinootthikela kilipelelaka, otthikela kilipelelaka, kimanaka mukhora mpakha Awo ohula." Vano nto okathi vakhani ovinre, wala ntoko nuuvira ewoora yaneethanu neili voosiis'ula, miyo kaarimweemela oxaka-ene.

¹⁵ Nsana, oowereiwa vakhani, kiphavelaka...kaaroomulya nakhuwo vakhani ahaakireerenle saana, ni oryeene ooviha saana, ni miyo—miyo kaaphavela okhuma mwa yeeyo. Ni—ni nto voosiis'ula, ntoko ewoora ya neethanu na tthaaru, khwiiraneya ophwanya Yoolempwa emosa yaakitikininh. Nto kiweha-tho Yoolempwa yeeyo, Eyo khukitikiniha-tho emaara ekina. Nto kirowa, kittharaka Yeeyo mwa Yoolempwa, nto kinoomalaru osoma minuutu vakhani sivinre. Tivo pooti okhala wira Apwiya

aakhalana Mutthaka wa hiyo, voosiis'ula, Satana eerenryawe onikhottiherya waakhela.

Mwaamuwerya omuruuha mwaamukhaani va, Munna Larson? [Nipuro vahiitthu mufiitani—Mol.] Muluku okhale ni yaawo ni aakhaliherya.

¹⁶ Vano kaahoopisihani, Ettiminku evinre, mahiku maili, ni kinoona wira...ahiiso, miteko miili s'okokhorela, voosiisu ni ohiyu, ni eyo ti yoolipa wa nyuwo. Kiroosuwela wira ela... Akina a nyuwo muhaana weetta mukwaha orowa ottaiwene, ni ocompa nihiku nimosa na muteko, ni sikina. Tivo hata vakhala wira ninrowa okhuma Ttiminku, Sekunta, esumana emosa okhuma vano, kinoolaleerya muteko wa Ettiminku enrwa, Apwiya yatthuna vale, moone, vaahikhale-ru wira muthukumano onoothuna wira okhale wa ohiyu. Moone, eyo, eyo ti...Aakhala anci-ene a nyuwo!

Akavi anamputi okhala olelo ohiyu, nrowe noone, okhalana muteko w'okokhorela olelo ohiyu? Vano, anamputi okhalana Ettiminku enrwa, avenxe ntata vootharelana? Ooh! Wulu, eri ntoko yoolikana. Uh! [Ookhala oniira, "Eroolikaniwa, munna!"—Mol.] Munihimya exeeni? ["Mukhalane imaara soopiili."] Uh! [Munna Ben Bryant oniira, "Mukhalane olelo ohiyu, ni esumana enrwa, nave, Munna."] Vano, vano, Ben!

¹⁷ Kookhalana Mutthak'ola, ti woorakama, voosiis'ula, masi miyo—miyo nkinsuwela moota...Ni koosuwela wira kinnikhaliherya opaka malamulo a ekereja, masi mwa yeeyo, mwaweha vale, miyo kihimye wira, "Voohikhala wira kinkaravari efiita." Munnona? Vano, ela okaravariwa wa efiita. Uh-huh. Vano khino nrowe niphavele otthika okathi woomiili, olelo ni Ettiminku enrwa, nto, enookhala Apwiya yatthuna vale, moone. Vano, mwaahaakhele-ru muhupi esumana ela, vano murwe Ettiminku enrwa.

¹⁸ Okinanara wooruuhani vaara vaili siiso, masi kinnoona wira nirina-tho okathi vakhani paahi. Ni muupuwele paahi, okathi wakelela-ru ohoolo, khaninrowa okhalana oreeriwa nno okathi munci-ene. Munnona? Muupuwele, etthu enoorowa wiiraneya. Wala malamulo anoorowa onihiiha, wala Satana onookela eriyari anyu ni oomwaryeni. Kweekwe enkhalaka siiso. Munnona? Etthu enoorowa wiiraneya, tivo nittittimihe khula minuutu ninkhalaahu vamosa.

¹⁹ Tivo vano w'ale arina otthikela owaani, olelo ohiyu, anrowa okhala ntoko Ettiminku evinre ohiyu, miyo kaarina paahi mu—Mutthaka mmosa mukhaani wookhuveya. Nto siiso, nyuwo, mwatthuna vale mufiitani, vano, vekeekhai nnimooveleliheryani efiita vakhala wira muhaana otthikela owaani. Khaninrowa...Kinrowa olaleya olelo ohiyu, Apwiya yatthuna vale.

²⁰ Kaahikhalana yoolepa nsana, ahiiso—ahiiso nsuri, Mutthaka mmosa mukhaani miyo kaalempe aka kuupuwelaaka mwaha wa etthu, ni ti ya khalayi saana. Sookhala Mitthaka miili, nnya. Eri ntoko wa seiyo miili, mmosa aya ti, “Esisterna yoovuva,” wala, “Wala ittheke ni ohepha eyuupuru,” Mutthaka wa Ehapari yoooreera paahi. Voosiis’ula mwiixuttiho. Nto siiso, olelo ohiyu, kinrowa olavula sa, “Wala ittheke ni ohepha eyuupuru,” ahiiso, “Esisterna envuuvu.”

²¹ Ni, voosiis’ula, kintthuna kisome mwa Yoolempwa Yoowaarya vano.

Nto mookhala oratta-ene? Mwiire, “Amen.” [Muthukumano oniira, “Amen.”—Mol.] Vaareera.

Vano kintthuna wira, mwa aBibilia anyu, mukhunle ni miyo Eliivuru ya Hoseya, nyuwo muntthuna osoma. Nto nisome iversiikulu vakhani sa kapiitulu 6 ya Eliivuru ya Hoseya, profeta.

Ni neemele.

²² Muluku Ootthuneya, hiyo kxanimphwanela okuxa Eliivuru ila mmatatani, okhala wira noosoma mwa Soolempwa wira khaavo mutthu Wirimu wala elapo ya vathi, wala vathi va elapo, aaphwanela wala hata aawerya okuxa Eliivuru, wala hata oweha Yeeyo. Oh, nto aahirwa Mmosa aari ntoko mwaapwittipwitthi iiviwe; Owo aahikuxa Eliivuru, okhala wira Owo taaphwanela, ni aahitaphula Ikanyero saya. Ni nimmulipelela Yoowo voosiis’ula wira uupulule soohimya iya silempwe Muliivuruni, okhala wira eyo Eliivuru ya Nvuluxo. Sothene iye sivuluxiwe silempwe mwemmwe. Niphwanye opuro ahu, voosiis’ula, okathi onkhalahu. Maana ninvekela mwa Nsina na Yesu. Amen.

Murwe naanaano, nto nitthikeleke wa APWIYA: okhala wira yaawo tanivulalinhe, ni yaawo tanrowa onipenuxa; awo tanikuminhe makhwatta, awo tanrowa oniloola.

Yavira mahiku maili awo anoonaakhela: nihiku na neeraru anoonihimuxa, ni ninrowa okhala ohoolo waya.

Nisuweleke, nilipiheryeke waasuwele APWIYA: okhuma waya ori ntoko oxa; ni awo antthuna onirweela ntoko epula, ntoko epula ya eyiita ennaaniha etthaya.

Nyuwo Efrayimi, kiwiiriheni exeeni? Nyuwo Yuta, kiwiiriheni exeeni? okhala wira ophenta wanyu ori ntoko neeku na voosiisu, ni ntoko okame oxakaru onaakuva omora.

Tivo miyo kihaattharuxa ni maprofeta; koowiiva ni moolumo a mwaano mwaka: ni olamuliwa wanyu onrowa okhuma ntoko waarya.

Okhala wira miyo kintthuna omoriwa ikharari, ni kahi mukuttho; ni omusuwela Muluku ovikana mikuttho soopahiwa.

Masi awo aahonona waataana ntoko Atamu: awo a—awo aakirukunuwela.

oKileyati ti epooma ya ale aniira sootakhala, ni woosareya ephome.

Ni ntoko nloko n'anawiiye aniwiipithela atthu, ti siiso nloko na anamukuttho aniiva ephiro ya oSikhemi: ni . . . anneettela sootakhala.

Miyo kihoona itthu soohirya munlokoni mwa Isarayeli: vale ori oraruwa wa Efrayimi, Isarayeli toothanyeya.

Nave-tho, nyuwo Yuta, kinnoolikanyiheryani ehukhumu, okathi onrowaaka waakumiha atthu aka mw'epotthani.

²³ Pwiya Yesu, mukumihe mwa Yeela, ni Erooho Yoowaarya Anyu, yoohimya entthuniwa, noolipelelakani-tho Nyuwo. Mwa Nsina na Yesu. Amen.

²⁴ Vano, mwaha aka voosiis'ula ti: *Osuwela Nihiku Nanyu Ni Mutthaka Aya.*

Hiyo ninnoona okhuma nisomi na Ettiminku evinre, ntoko siixuttihalyahu, *Niira Na Malope*. Ni kintthuna nwiriyane saana, vano, okathi—okathi wa Isarayeli muroroconi mwa Muluku.

²⁵ Hiyo olelo ninihimya mwaha wa nisomi na exikola ya Ttiminku, kintthunaaka wira nyuwo musuwele saana ni musuwele okathi onkhalahu. Nihanle omaliha, ntoko sinoonanyu. Vano nto, mwa yeela, muhaana osuwela ewoora ene ni okathi, ni ethooneryo ni Mutthaka murinaanyu waakhela.

²⁶ Vano, ntoko sipacenryahu Ettiminku evinre . . . Naarwa nilavulaka wira naarowa olaleya mwaha wa Malope, Malope Mathanu na maili ookiserya a Bibilia. Ni miyo, mmansaka, koona wira yaarowa otaphuwa voolikana ntoko Ikanyeryo. Masi kooweha wira mwa khula emosa wa otaphuwa nno yaahikhala etthu yuulupalexa yaakhumelenle.

Ni ntoko silaleiye ahu *Wakathi Mithanu na Miili sa Ekereja*, ni iyo saari soolikana mpakha Erooho Yoowaarya Eneene orwa eriyari ahu khulipiherya, khuhela mpapheloni mwa ihapari, khumwarya mulaponi mothene, khooniherya mmweerini wirimu, ni khunooniherya, isumana ni miyeeri ehinatthi okhumelela, voolikana enamuna yaarowaya okhala, voolikana-ene. Vaava mutapernakulu Owo khusuweliha. Va mwa . . . okathi, Owo khusuweliha. Vamweerini ni vansuwani, Owo aahisuweliha. Ni mwa mukhalelo wa ilapo okathi ula, Owo aahisuweliha; moota etthokiheryo ya oruma wa oRooma ekhumme aya khutthikela oPalestina, voohimmwa aari paapa

oopacerya aatthinke okhuma (awo annihimya) Petru aari paapa. Vano, yaari yuulupalexa!

²⁷ Vano, hiyo ninnoona, sihinatthi Ikanyeryo Thanu na piili saaipithiha isiiri sothene.

Miyo kihisuwelaka etthu kaakwerethaaka vakwaaturu, sa Wakathi sa Ekereja. Miyo nkinatoko. Muluku onnisuwela. Mwaha wa yoowoona paahi, miyo kaarookweretha. Kihisuwelaka wira Muluku, mwaakha mmosa ni miyeeri mithanu na mosa ohoolo waya, aamurowa olipiherya yeela wirimu, ni mweeri, ni okumihia mpapheloni mwa ihapari. Miyo nkaasuwela eyo. Miyo nkaasuwela wira waamukhala oripela wootikiniha omweerini, wira othoonerye Okathi ola wa Lawotiseya.

²⁸ Vano, mpapheloni mwa ihapari, nyuwo mumphwanya wakathi mithanu na mosa paahi. Okhala wira ekereja ya Lawotiseya yaari yooripela voomalela. Nto nyuwo mwawehe ehelelo ya muroohoni, ntoko Muluku sihenlyawe wirimu. Okathi ohenlyaka va elapo ya vathi, kaahihya nipuro naamukhaani, ntoko sinoonanyu, waarya vakhani paahi. Eyo waari okathi vakhani Oothanliwa ene aaryawe ohalelaka wiitthaniwa okhuma elapo ya vathi, etthu kaahelenlyaka eyo vale wa okathi wa neethanu neili. Masi okathi Muluku ohenlyawe wirimu, waari wooripela voomalela, enihimya wira khino ole ookiserya ohiitthaniwa okhuma Okathi owo wa Lawotiseya. Hiyo khanisuwene. Vaamuweryaneya okhala mutthaka onihimya yeeyo.

²⁹ Vano nwehe-tho, sihinatthi i—Ikanyeryo Thanu na piili, yeeyo kahaarinaaka hata muupuwelelo wira yaari siiso.

Va otapernakulu Owo aahilavula yeela, ni khukiruma oTucson, Arizona, ooleelakani nyuwo othene sothene saarowa okhumelela. Ni aakhala axilopwana akilaanthe vaava, olelo, yaari weiwo wira yoone wiiraneya siiso ntoko saahimmwe aya va wira yaamwiiraneya, “Malaikha Mathanu na maili yaamurowa orwa.” Nto ipaphelo sa ihapari saahilaleerya yeeyo, ni irevista, mulaponi mothene, “Nreko nootikiniha na Waarya ni mukhalelo wa epiraamite,” voolikana ntoko sikwerenthe aka va kiwoonihani. Waavennye okhuma nipuro Malaikha ale yaaphwanyaneya, khuruwa imiilya miloko miraru orakama, ni yaarina imiilya miloko miili ni mithanu na miili epantte ni epantte; ahiiso imiilya miloko miili ni mithanu na miili orakama, ni imiilya miloko miraru epantte ni epantte, kinooliyala ele yaari-aya. Ni waahooniwa istaatu sikina, voolikana osulu wa oTucson, Arizona, vaavo vene yaakhumelenlyaya, okathi ene yoowo.

³⁰ Moone, bi—Bibilia, Muluku khori paahi...Ola kahi paahi mutthu oneererya wo—wookhanyereryani etthu, masi owuupululelani muhelelo wa muroohoni wa ewooro ela.

³¹ Vano nto, Mutthaka ontharelana, owo waatthukunle Ikanyeryo Thanu na piili, yoowo waataphunle isiiri sothene soowiiipithihiwa sa mBibiliani, Miixuttiho, ni sikina. Yeeyo, olumwenku ompwapwelaya voolipa murima mahiku ala, onoopwapwela Yoowo ni ohimya wira ti woovonyeya, *ela, ele*.

³² Nno nihiku nlo wArizona, elupanyaka ifiita, wira ekihimihe itthu kihihimye aka. Muupuwele paahi yoowoona ya nlamulo na wArizona! Bibilia ohimye wira, “Vaamureerela okhalana nluku muxikoni.” Ni etthu ekina, wira, “Onakhaleru pani,” akhale mulaleyi wala ole onrowa okhala, “onrowa okumiha Nuulumo nimosa Mu, wala waacererya nuulumo nimosa Mu!” Atthu ahelaka otaphulela waya mmansaya mwa Masu ntoko Awo avaheriwaaya, aphavelaka ohimiha Awo etthu kihihimye aka, ni, kahi Masu aka; Awo Masu Awe. “Ole onrowa waacererya, wala okumiha!”

³³ Vano nto, mwa yoowoona, hiyo noowoona maprofeta ala akhuruwaka arukureryaka, ntoko koohimenryakani, kookupali, Ittiminku sinci-ene sivinre. Sothene sinimwiiraneya. Miyo kiirale, “Mukhale ottaiwene wa yeeyo tu.” Vakhalaru wira kinoowana, weeso Muluku khokhanle owanaka. Masi nrowe nimuhiye Owo alakiherye. Owo ti Ole onkhapelela. Munnona?

³⁴ Vano hiyo noowehe, Ettiminku evinre, yaahikhala... kilaleyaka mahiku a niira. Ni naahikhala niira na pentekosite. Ni eriyari ya niira na pentekosite ni niira na malope, waahikhala okathi munci-ene; vekeekhai mahiku miloko mithanu eriyari ya pentekosite ni niira na malope. Nto mahiku miloko mithanu, yeeyo, *pentekosite* enihimyaya “miloko mithanu.” Waari ottikinyiwa wa ehupu, wala okel-...Mihokorokho soopacerya sa ohepa saaruhiwaya. Ni ninnoona wira yaari mwa ethoonyeryo ottuli wu, ni mihokorokho soopacerya sa ephattu, ethoonyeryaka mihokorokho soopacerya sa Erooho Yoowaarya wira simwaraxeliwe atthu.

Ni ninnoona, nto, wira mahiku awo miloko mithanu yaakheliwe ni Amalapo, yeeyo, “Muluku owiitthanne awe okhuma mwa Amalapo atthu wa Nsina Nawe,” niira na pentekosite. Ni ninniviraka niira nlo noolekela na pentekosite.

³⁵ Vano, vekeekhai, okhuma mahiku miloko mithanu, saarowa okhala isabbath thanu na piili soolikana. Ni isabbath thanu na piili saathoonyerya Wakathi Mithanu na Miili sa Ekereja, saarowa wiitthaniwa okathi wa niira na pentekosite, na Pentekosite, wira owiitthane atthu a wAmalapo wa Nsina Nawe.

Vano, wookiseryani wa isabbath iya thanu na piili, seiyo saari, naarowa okhala Nihiku na Ettipiheryo, yaawo yaari Malope Mathanu na maili. Ni Malope Mathanu na maili yaari wira yiitthane nihiku na ekuttho, otthikela Mukuttho, wala, Ettipiheryo. Ni ninnoona nto, wira, Isarayeli, Malope Mathanu na maili animwaasa Isarayeli paahi.

³⁶ Vano, nto, mwaha Owo ahaakitthuniheryawe olaleya Malope awo Mathanu na maili. Miyo hata kaahilikana wira kihimye, kaahikhalana isalawu soolikana ni sothene wira kivolowe, wira kilaleerye Malope Mathanu na maili. Nto miyo khwira, “Yookhala etthu enikihaaxa vanci-ene,” miyo khwira. Hiyo khutthikela nivaraka muteko, ni Billy ni othene ahu, niphavelaka otthokiha sothene wa empa ya ettheke yooerehiwa, wa esumana ela enrwa, wa Malope Mathanu na maili; nirina mahiku muloko, wala mathanu na mararu, aahikhala autitooriyu a oxikola. Masi Erooho Yoowaarya khiyaakitthunihenrye wira, mwaha wa niwoko nimosa, nto miyo kitikinihiwa mwaha wa xeeni.

Ni okathi ovolonwe aka wira kivekele, khwaahimeerya amwaar’aka, “Kinrowa ovolowa.” Vano vaxariya-vo kikokhora ohoolo wa Muluku, wira kivekele. Nto Owo khukuupululela wira Malope awo Mathanu na maili yaarumme vathi va Ekanyeryo ya Neethanu na mosa, ni wira miyo koolaleya, enamuna ya erimu. Moone, nlo ntata na Muluku, etthu yothene. Ela onaasiwa Isarayeli, ni hiyo noohimya eyo vathi va Ekanyeryo ya Neethanu na mosa; nyuwo othene murina eyo, ntoko olupatthiwa w’aYuta.

³⁷ Okathi w’Amalapo onkhalaka niira nla na pentekosite.

Malope, vathi va...othene aya yaarumme vathi va Ekanyeryo ya Neethanu na mosa. Ni hiyo naahihimya eyo Ettiminku evinre, vathi va niira na malope, nyuwo othene mwaatthunaka vale wiiwa. Yaari wira yiire exeeni? Waakhanyererya aYuta, a mapuro othene a molumwenkuni, otthikela elapo aya. Ehaana okhala weiwe. Ni otaphuliwa wa Ikanyeryo, vathi va Ekanyeryo ya Neethanu na mosa, ni vathi va...Malope Mathanu na maili yaarumme mwa—mwa Ekanyeryo ya Neethanu na mosa.

³⁸ Vano, Mutthaka wa nlaikha na neethanu neili ori wira otthukule esiiri ya Ikanyeryo, owiitthanaka anamuteko Amalapo a ewoora yanamuloko n’emosa wira yaakhele elivelo emosaru anamuteko a ewoora yoopacerya yaakhenle aya. Munnona?

Vano, Yesu ohiixuttiha. Owo ohimmye wira yaahikhala athu yaaronwe ohepa. Awo yaahilepeliwa muteko. Nto vaalempwale aya, voosiisu oxaaka, awo yaahaakhela o—o—okathi, esentavo emosa ya nihiku. Vano nto othana eriyari, mukina aahirwa khurowa ovara muteko. Vano nto ewoora yanamuloko n’emosa, ekhanle ewoora yookiserya ya nihiku, mutthu aaphin’ye awe khwaakhela enamuna emosaru ya elivelo awo yaakhanle aya ewoora yoopacerya ya nihiku; ewoora yookiserya.

³⁹ Ti yoolikanaxa, moota anamitthaka a ewoora yoopacerya ni Masu, ni Ehapari yooereera, ni Ekeekhai, awo yaaruule Nihiku na Pentekosite. Nto waahikhala okathi w’epiphi waattiyelenle. Nto eriyari ya nihiku, Lutero, ni Wesley, n’akina, khurwa. Vano nto ori wira okhale Mutthaka wa makaaripi, ni wira naakhele

etthu emosaru awo yaakhanle aya woopaceryani. Mutthaka wa makaaripi ori wira ohokoloxe-tho, wira ohokoloxe-tho etthu emosaru yeeyo.

⁴⁰ Ni muupuwele yoowoona ya esumana yookiserya, wira okathi Mwaakameliwa orwiiye-awe wira akhale... wooniheriwa woopacerya wa yeeyo. Khurwa Mwaakameliwa mwaamukhaani, oophwaneliwa, mwa yoowoona. Nto miyo, kihuupuwelelaka yeela; kikilaanthe-ene vale paahi kinwehaka epantte ya ota. Nto vale khurwa Mwaakameliwa. Kaahiiwa Nsu nimosa epantte ya miyo, niirale, “Va ori wooniheriwa khalayi-ene wa Mwaakameliwa.” Nto Owo khuvira. Miyo khunweha, moota Owo aaryawe, oophwaneliwa saana, ooreera, mwali. Owo eetta saana munivaloni ntoko saaweryawe, kahi mweettelo; enamuna paahi yo weetta ya mu—muthiyana, moota awo aneettaya voosivela, wa athiyana. Ti siiso Owo eettaawe, orwaaka moonno aka woorthiyana epantti *ela*, vano Owo khulakaseya wiitho waka.

⁴¹ Vano Owo khukurukunxela moonno woolopwana, ni khukooniha khula ekereja okathi saawelaya mwa okathi. Nto, oh, soohifayi saana! Nto wookiserya waari okathi wa ekereja wa nihiku nla nookiserya, yeeyo yeetthiwa ni mukhwiri. Ni iyo saawanre voohifayixa, voowooneya vootakhalaxa! Ni seetta voothariha erumelo ya twist ni rock-and-roll. Ni athiyana ale yiiseettihaka vooripithuwa, evarenle-ene epaphelo paahi, yoottweelela, veenamirima miili, olu-... Yoottweelela eri eriyari ya otteela ni oriipa, nenlo nikhanle nthepa noowoototha. Yoottweelela kehiyo yootteela nnakhala yooriipa. Nthepa noowoototha. Ni epaphelo yooneya ottweelela, evarenle-ene ohoolo waya, ni isaaya sa wiina wa havayi soolikana ni erenta evarenle-ene ohoolo waya, ni epwitipwiti voomalela okhuma muyuununi mpakha osulu. Ni yaamweettasa o... ahiiso okathi, ahiiso eripithuwaka, ni yiitikinyaka ni muusika owo, yaattamelaka. Nto khwira, “Eyo ti ekereja.”

⁴² Ni okathi eyo ekivirenlyaya, murima aka waahalela omaala. Miyo khuupuwela, “Ti yeele emphavela wiisooniherya wa Kristu, ntoko Mwaakameliwa? Ni wiilipiha wothene n’itthu mutthu oniirakaawe, wira aphavele omukumiherya Mwaakameliwa a Kristu; nto namuttompe oohureya, oonyakhuwa, oowooneya ottakatta ntoko ole okhala Mwaakameliwa a Kristu?” Eyo yaahikiwereiha murima.

⁴³ Nto okathi evinryaya, nuumala eyo... Erwaaka ohoolo wa vaavo naaphwanyanياهو, eyo yaavarenle epaphelo ohoolo waya, enyokolowaka, ni emwiinaka rock, ni yiitikinyaka epantte emosa vano nto epantte ekina, okathi yaaviraaya, ntoko soowiina sa vano arinaaya nihiku nla, yiisirihihaka enamuna yoohifayi okathi yeettaaya erowaka.

⁴⁴ Miyo nkinaakhula itthu iya. Kinwerya ohimya paahi ele

koonale aka. Ni Muluku ntoko Mphuki aka, masi eyo yaari ekereja ya wAmerika.

⁴⁵ Vano, okathi eyo yaaviraya, epanthe yothene y'ottuli khiyaarina hata ekhuneelo nnakhala. Vano nto okathi evinre aya, kaahiisoona ovolola ni owereiwa.

⁴⁶ Vano Owo khwira, “Mwaakameliwa onimoorwa wooniheriwa-tho.” Nto va aahirwa Mwakameliwa ottuli waya, Mwaakameliwa oolikana oratteene ni ole aavinre wopaceryani. Vano murima aka waahitupha mwaha wo otteeliwa, osuwela wira onookhala Mwaakameliwa. Ni Owo onrowa opakiwa ni etthu emosaru, ni oowara etthu emosaru, ni Ole aari wopaceryani. Owo ohanle wiitthaniwa.

Ni koosuwela wira eyo Ekeekhai. Eyo yaahikhale ekeekhai, weeso khula yoowoona kaarinaaka ottuli yaari yoovonyeya. Ni khula mutthu onnisuwela, wira, Owo khonanileeleke etthu yahaakhanle Ekeekhai. Enniiraneya, voolikana . . .

⁴⁷ Ni munniwerya wona, nto, otakhala wa ekereja ya vano, yiisiitthanaka “ekereja”?

⁴⁸ Ntoko mutthu saahimye awe nihiku nlo; Munna Ruddell, munna aka mmosa ooreera murima, eemenle ophiteenrye exiri vale naanaano va. Wira, owo aahoona ela ntoko erintta nawiiye vanttoroni va eviteera. Ni naavaanyihana yeela musaala nihiku nlo. Nto Munna Ruddell aarohaxeya mwaha wa mikhalelo sa okathi ni mo—ni moonelo wa erooho mmakerejani olelo, moota opacenryaya omora. Arumeyi anikhuma mapuro othene, ni mivaanelo nno, akohaka, “Exeeni ekhumelenle, Munna Branham? Exeeni ekhumelenle?” Oh, wulu!

⁴⁹ Munna Ruddell aahikikoha etthu, “Awo ankhala ni erooho ya Satana, wala exeeni?”

⁵⁰ Miyo khwira, “Nnari, erintta nawiiye enkhala ni ikuru ya eviteera.” Eyo enkhala ekumi okhala wira, muhokorokho sitriinu, n—nlimu ninniweya wunnuwa vamurarancani; masi khanniima iraranca, ninaamwi nikhalaka mwaha wa ekumi aya.

Ni ekereja, eniitthaniwa siiso, erintta nawiiye paahi ettopyaneriwe, ekhalaka vathi va nsina na etiini, vathi va nsina na ekereja. aKatolika ni aPrustante, irintta nawiiye paahi, sikumihaka e . . . mwa ikuru sa Eviteera; ni nnakhala vo yiimaka mihokorokho sa ele awo akhanlyaya, okhala wira kharukunxiwe murima. Awo khayaari mwa etthokiheryo yoopacerya, yoothommwa ni Muluku, tivo awo arinaaya okhoottaka Masu ni wiima muthinto mukina wa muhokorokho. Mwiri w'eeekhai ni wooloka, mmutathaarini mwaya, otthomeliwe wiima iraranca vamurarancani.

Yesu iirale, “Miyo ka Mwiri; nyuwo mwa irintta.”

⁵¹ Masi mwiri uwo waphiyerya-ru ophuwa erintta ekina, onimwiima muhokorokho aya woopacerya. Ni ohaana okhala

wuuluuliwa wa ithu iya sothene, wookiseryani wene wa Mwiri. Ohaana okhala, okhumelela, wuuluuliwa, Waarya wa makaaripi wira omwaleele Yoowo ni okhaliha woolikana. Masi onrowa okhuma Vamwirini, kahi muromolelo ottopanyeriwe mwa Yoowo; masi okhumela woopacerya wa Masu. Ohaana okhumelela wa okathi wa makaaripi. “Ni onookhala Waarya okathi wa makaaripi.” Ontthuneya Waarya wira ottokotthihe Yoowo.

⁵² Munnoona moota Yoolempwa eryaaya yoolikana! “Nihiku nimos a nihinrowa wiitthaniwa othana wala ohiyu.” Muhokorokho khokhanle ottokotthaka nihikhanle nsuwa nintokotthiha. Khivancala moota xeeni onlaleiwaaya, etthu p’ithu eniiriwa, khenwerya oottokottha, khivanweryaneya wooniheriwa, khivanweryaneya olipihiriwa; woohikhala paahi ni Yoole ohimye wira, “Miyo ka Waarya wa molumwenkuni,” Masu. Tivo ohaana okhumelela o—o—Owerya, Erooho Yoowaarya Eneene, wira ettokotthihe, wala olipiherya, wala wooniherya, wala wira yoonihiriwe ele Owo aahimye awe wira yaamwiiranyeya nihiku nla. Waarya wa makaaripi onnikumiherya yeeyo. Okathi xeeni!

⁵³ Mwaakameliwa aavinre nipuro nimosaru nenlo Owo aaryawe okathi aaryawe wopaceryani. Masi miyo kaamunweha Owo akhumaka nnivaloni, ni kiphavelaka ompurula Owo wira atthike. Vano, yinci-ene vaamuweryaneya ohimmwa mwaha wa ithu iya, sa nihiku ninkhalahu.

⁵⁴ Vano, Hoseya oohimya, 6:1, “Mutthikele w’Apwiya.” Muupuwele, owo ohimye wira awo yaamurowa omwaramwareya, vano awo yaahimwaramwareya. Owo iirale, “Awo anootthikela w’Apwiya, vaamanlyaya omwaramwareya, ni Awo, onimwaaloola.” Nwehe, “Mutthikele . . . Omwaramwariwa; yaneili . . . Yaahikawanyiwa, khukhalihwa oohoona.” Vekeekhai ti yeeyo yaakhumelenle. “Owo onoonipenuxa, ni onooniloola.”

Ntoko Esekiyele 37, “Makhuva oowuuma, nxepa noosareya makhuva oowuuma.” Esekiyele aahoona eyo, etthikelo aya.

Vano nwehe, Hoseya iirale, “Nuvira mahiku maili!” Nuuvira mahiku maili Owo aamutthikela wa yaawo. “Owo onoonaa khela ni onoonivaha, onoonivaha ekumi.” Vano, *ovaha ekumi* khenihimya “ohihimuwa.” *Ovaha ekumi*, vo, nuulumo nimosaru ninrumeeliwa khula nipuro nikina, koophavela naanaano, enihimya, “muhakalaliho.” “Owo onoonivaha ekumi nuuvira mahiku maili.” Eyo yaarowa okhala, “Nihiku naneeraru Owo onoonivaha-tho ekumi, vamanlyawe Owo onimwarya, ni onikhaliha oohoona, ni onihaaxa.”

⁵⁵ Moosuwela, aYuta yaahikhalihiwa oohoona wa etthunelo ene yo wira hiyo nikhalane wona. Awo yaahivalanihiwa, khumwaramwariwa, ntoko nloko, ni aamukhootta Mesiya aya; wira hiyo niwerye omwaakhela Mesiya, wira awerye okhala

athu oowiitthaneliwa okhuma w'Amalapo mwaha wa Nsina Nawe.

⁵⁶ Vano, mulopwana onoorwa, nto muthiyana onaakhela nsina nawe. Amalapo ala oohoonahinwerya woona Nsina nlo, "Pwiya Yesu Kristu," moopatisuni! Ti yoowooniha othunku saana, masi ehaana okhala siiso. aYuta, awo yaahaana o—awo yaahaana ohoona eyo. Ori mmosa paahi onwerya woona; owo ti ole otthomeliwe woona. Enamuna ekina, nyuwo khamunkhalakhala moonaka eyo.

Ayuta khayaawenrye woona wira ole aari Mesiya aya. Ni, nnakhala vo, awo yaari asomi ni mateyooloku, athu a elakeyelo yoosuwelaxiwa vaalupale, yaamusoma Bibilia mmosaru yoowo mummusomanyu. Vano, vamanlyahu osuwelihiwa, ninniwerya woona oratta-ene, wira ole aari Mesiya. Masi, awo khayaawenrye woona, nnakhala khanwerya woona olelo. Yoolaleeriwa wira, ni awo yaarowa okhala oohoonahinwerya woona.

⁵⁷ Yoolaleeriwa wira ekereja, nihiku nla, yaamukhala yoohoonahinwerya woona. Wira ekhoothe Mutthaka wa makaaripi. Wiisuupulula 3 ohimnye siiso, "Nyuwu mwa ootakhaliwa, oothoiwa," nkawehani mukhalelo wa mwaakameliwa ohiyu ole, ahiiso ekereja, "epwitipwiti, yoohoonahinwerya woona, nave khensuwela." Pwiya Yesu, munimorele ikharari! Bibilia ohimnye wira eyo yaari "epwitipwiti." Nkinatoko woona mpakha naanaano va. Ekereja ya Lawotiseya khiyaawanre etthu. Ni okathi eyo yaaruule aya ohiyu uwo, eyo yaari "yoohiwar'etthu," nkaatonko oweha eyo, "nave khiyaasuwela."

⁵⁸ Oh, moota kinxukhuru aka! Moota, khivanxankiha hiyo okhalaka ooxukhuru vanci-ene! Kinnoona wira khaninxukhuru voophiyerya mwaha wa itthu Muluku onnisuwelihaawe.

⁵⁹ "Oohiwar'etthu." Ni soowoona siirale, saakonihale wira eyo khiyaawanre etthu ni khiyaasuwela, ni "yoohoonahinwerya woona." Ntoko Isarayeli saakhalihiwe awe oohoonahinwerya woona. Amalapo ewerye ovolowa, vano Amalapo aakhalihiwa oohoonahinwerya woona. Mwaakameliwa akumihiwe ni Isarayeli awerye waakhela niira na Malope. Voolikana-ene!

⁶⁰ "Nuuvira mahiku maili Owo onoonivaha ekumi, wala onoonivaha muhakalaliho, anaataanihaka, aYuta," alavulaka mwaha wa Malope ala vano. Nto Owo ono... "Ni hiyo ninookhala ohoolo Wawe, ahiiso ninookhalana Ekumi Ehinimala. Moone, hiyo ninrowa okhala ohoolo Wawe." Bibilia oohimya va mwa Hoseya, ohimnye wira, "Ni ninrowa okhala ohoolo Wawe; Ekumi, okhalana Ekumi ohoolo Wawe." Eyo Ekumi Awe Yoowo mwaneene, Ekumi Ehinimala, "okhalana Ekumi ohoolo Wawe."

"Ole onkhala mwa soopuha owo ohookhwa hata nlelo akhalaka." Tivo hiyo... oolaiherya wira Isarayeli aamukhalana-

tho Ekumi ohoolo Wawe. Owo ohookhwa, wa sookhumelela, ni wa niira na pentekosite.

⁶¹ Vano nwehe, oratta-ene. “Nto nuuvira mahiku maili.” Vano, eyo khayaaahimya mahiku maili a iwoora miloko miili ni xexe, okhala wira ennikhakala. . . Eyo yiiraneieye ottuli wu saana, miyaakha imiya sene sivinre. Munnona? Yaahimya wira, “mahiku maili n’Apwiya,” nuuvira miyaakha ikonto piili. Vano, moosuwela okathi xeeni ovinre okhuma okathi yoowo? Soovira miyaakha ikonto piili ni imiya thanu na piili okhuma yeeyo, okhala wira mwa Hoseya va ti 780 A.C. 1964, moone, soovikana miyaakha ikonto piili ni imiya thanu na piili sivinre. Owo iirale, “Nuuwira mahiku maili, nihiku naneeraru, Owo onoonivaha-tho ekumi, ni onoonivaha Ekumi ohoolo Wawe.” Ti vaavo Malope anvolowaya. Eyo ti ewoora enkhalahu, nihiku ninkhalahu.

⁶² Vano, awo yaahimwaramwariwa, yaahikhalihwi oohoon, ni othukumanyiwa, ni aapwaha mpakha nihiku naneeraru. Munnoon yeela. Awo yaahimwaramwariwa, okhuma oPalestina, molumwenkuni mothene. Awo yaahikhalihwi oohoon, wira emukhootte Mesiya. Nto vano aathukumanyiwa elapo aya, oolikanela Malope, wira akupali Ettipiheryo.

Ntoko Bibilia sihimmye awe, “Okathi awo anaakhelaaya Yeela, ni animphwanyaya Owo ni mirahu sa ipereku,” nuumala Ekereja okuxiwa, “ni aniiraaya, ‘Mirahu iya mphwannye woowi?’ Owo iirale, ‘Owannyaya apatthani Aka.’” Ni Owo ohimmye wira, “Awo yaanvalaana, khula etthoko, ni yaamunla ni osikula, mwa mahiku, ntoko etthoko epweteiwe mwan’aya mmose-ene.” Muupuwele, niira nlo na Malope naari wira niire yeeyo. “Wunla, wunla ekuttho mwaha wa Mukuttho woowiwiwa,” ni awo yaarookhootta Yoowo.

⁶³ Awo ari elapo aya. Awo yaahimwaramwariwa, okhalihwi oohoon, nto vano oothukumanyiwa. Ni sothene saari vathi va Ekanyeryo eyo ya Neethanu na mosa, Malope aya Mathanu na maili. . . yaahiruma wira yaathukumanye vamosa, Nlope na Neethanu na mosa. Na neethanu neili ti “Nlope nle nuulupale,” ntoko soonalyahu Ettiminku evinre. Nlope na Neethanu na mosa naahiruma vathi va Ekanyeryo ya Neethanu na mosa. Voolikana ntoko Ekanyeryo ahu ya Neethanu na mosa yaataphunwe aya, itthu sothene okathi mmosaru; masi, awaya othene yaarumme okathi mmosaru; okhalaka wira, hiyo nri miyaakha ikonto piili muniirani na pentekosite.

⁶⁴ Vano, miyaakha ikonto piili ni imiya thanu na piili okhuma okathi yoowo. Owo iirale, “Nihiku naneeraru, ninoothukumanyiwa-tho. Nuuvira mahiku maili, nihiku naneeraru, ninoothukumana-tho, ni ninimwaakhela Ekumi ohoolo Wawe.” Munnimoona natiri? Ewoora yoolempwa oratteene vaxirini. Ninnoona vatthu vankhalaahu.

⁶⁵ Vano elapo aya, alipelelaka Niira na Malope, wala okupali Ettipiheryo, ni wira elipelele Orwa, wira yinle ekuttho mwaha wo okhootta waya wa emaara yoopacerya yaakhoottale aya Yeeyo. Awo ari elapo aya mwaha wa yeeyo, elipelelaka. Awo othene akhalenleni . . . Sothene sooheliwa voopuroni.

⁶⁶ Ntoko murumeyi a Ehapari yooreera, nkinwerya woona etthu ehanle woohikhala orowa wa Mwaakameliwa. Ni Mwaakameliwa ohaana okumihiwa awo ahinatthi osuwela etthu ekhumelenle. Awo yaahilooliwa, yaahimwaramwariwa . . . kiireke, yaahimwaramwariwa, yaahikhalihiwa oohoona, nto vano aathukumanyiwa. Exeeni ehanle? Mwaakameliwa okumihiwa mphironi. Awehereryaka orowa wa Mwaakameliwa, wira maprofeta aya a Wiisuupulula 11 awerye owiihanela niira na Nlope, wira yaasuwelihe etthu awo yiiralyaya.

⁶⁷ Muupuwele, eriyari ene ya Ikanyeryo iyo, yaahirwa Ekanyeryo ya Neethanu na mosa. Ni yaahikhala ikonto emiya ni ikonto miloko mixexe n'atthu ikonto xexe, oothanliwa ni oowiiwthaniwa. Ni eriyari ya Nlope na Neethanu na mosa ni na Neethanu neili, Wiisuupulula 11 onkhumelela vaavo volikana-ene muliinyani ni Ekanyeryo ya Neethanu na mosa.

⁶⁸ Wira iire exeeni? Yaari wira yiire exeeni? Ni yaari wira ela yaaruuhe anamoona aili, Moise ni Eliya, maprofeta. Yeeyo, aYuta aniwaamini maprofeta aya paahi. Ni awo anrowa orwa ni ethooneryo ya maprofeta, ni muteko aya onrowa okhala wa profeta, okhala wira awo yaahiira volikana.

Yooniheryaka etthu emosa, wira, mutthu, mwakhwa vale wala etthu p'itthu, okathi onihyaanyu olumwenku ula, mukhalelo anyu khonrukunuwa. Nyuwo mwakhala nawoothe vano, munrowa okhala nawoothe iwe. Mwakhala oovihiwa nno, munrowa okhala oovihiwa iwe. Mwakhala namahoverya nno, mwaamukhala namahoverya iwe. Alopwana ni athiyana, ola okathi wo wiitatha ni wiithokosa, ni woona veemenlyahu, okhala wira okhwa khonrukunxa.

⁶⁹ Awo yaahirowa mwa miyaakha ikonto piili. Moise mwa miyaakha soophiyaka ikonto piili ni imiya thanu, ni Eliya okhuma okathi. . . Miyaakha soohalelaka ophiya ekonto emosa ni imiya thanu Eliya varonwe awe, ni Moise vaaronwe awe, nto va awo anthhika ni mukhalelo mmosaru ni aniira itthu imosaru.

Okhwa khonimwiiriha etthu mutthu woohikhala waakakhanya nipuro nawe n'okhala. Khonrukunxa mukhalelo anyu. Khonrukunxa waamini wanyu. Khonrukunxa etthu mwa nyuwo woohikhala nipuro nanyu n'okhala.

⁷⁰ Tivo, mukhalelo anyu tuuvi voosiisu ola! Mwakhala namahoverya Masu a Muluku, mwaarowa okhala namahoverya iwe. Nkincala moota mukhanle anyu ooreera murima, moota munkhalanyu, ni moota munkhalanyu vooreera, okhwa khuwaarowa woorukunxani nnakhala vakhani, nipuro nanyu

n'okhala paahi. Ni mwaahiwerye okupali Masu othene a Muluku enamuna alempwe aya, khimwaarowa wira Iwe; tivo, muhivela-vele, khamunrowa okhala Iwe.

Muhaana okupali Awo mwa omalela Waya, mwa oweriya wo olipiheriwa Waya ni wuupululiwa wa etthu Awo akhanlyaya, vano munkhala epantte ya Yaawo. Ti Masu Awe paahi Owo onrowaawe ohihimuxa, ntoko Owo saahihimunxe awe Masu Awe voosiisu woopacerya wa Paasikha. Masu Awe paahi ti yaakhumme, ni ale yaakhwiiye mwa Masu Awe, yaaminiki Masu Awe ni yaalipihenrye Masu Awe.

⁷¹ Nwehe, vano, eyo yaari miyaakha ikonto piili ni imiya thanu na piili sivinre. Nwehe, awo yaaroomwaramwariwa, yaakhalihiwe oohoono, nto vano khuthukumanyiwa. Vano, etthu enttharelana okhala wira awo anrowa waakhela Ekumi.

⁷² Ni Amalapo aniiythaneliwa okhuma. Mwaakameliwa oolikana. Okuxiwa ori vakhiviru. Ninniweriya osuwela yeeyo? Ninoowerya tthiri waamini yeeyo? Eyo ehantisi etharihiwe? Eyo ethale, wa hiyo? Eyo etthu enikhala ntoko y'ekeekhai? Eyo etthu hiyo, ota, ninweryahu waamini? Wala, eyo etthu eri mwa hiyo, ekhanle epantte ya hiyo, ekhanle yoovikana ekumi wa hiyo? Ni mweettelo xeeni onkilaathi ahu, voosiis'ula, mutapernakulu mu? Muupuwele, ninrowa okhala nikoto nikhaani ninrowa waakhela Yeela.

⁷³ Vano elapo aya, alipelelaka Malope. Vano alipelelaka orowa wa Mwaakameliwa mwaamukhaani, wira Wiisuupulula 11 amalihieriwe. Okathi wa ekereja woomala; Ikanyeryo sootaphuliwa, sinooniherya ele ehiiwe ota okathi wa ekereja, ni Mutthaka woovahiwa. Isarayeli ori vanlakani, aleluya, oolikanela Niira na Malope.

⁷⁴ Oh, nyuwo axilopwana ilapo sikina weiwo onrowaanyu wiiwa efiita ela, khamunwerya ovenya, munn'aka? Wala, Ela enookhalihani oohoono? Nyuwo mwaamurihela Ela ota ni wiithana okhala oprofeta woowootha? Okathi, Eyo enlipiheriwaya ohoolo wanyu, ni olumwenku, ni okathi, ni atthu, nave ni Erooho Yoowaarya Yeeyo elempe Yeela. Yoolipiheriwa, v'ephattu, mwa erooho, mwa erutthu. Itthu sothene Owo ohimmye awe soomalihieriwa ni sihoonihieriwa.

⁷⁵ Isarayeli elapo awe; ooweettiherya weiwo, ohaathukumanya weiwe, ntoko ipwittipwitthi. Amwiici aroorowa mpakha yaawo ni khwaatthawiha otthikela olipa, orowa elapo aya. Muupuwele, Isarayeli onlaiheriwa paahi oreerihwa vakhalaru wira ori elapo awe. Muluku khonamureeriheke Isarayeli ota wa elapo aya. Abrahamu aarookhumela ota wa elapo, khuhukhummwa. Atthu othene anihya muttethe anoohukhummwa. Muluku onwerya paahi omureeriha Isarayeli okathi owo onkhalaawe elapo awe, ni owo ori weiwo vano ntoko nloko. Ni Ekereja ehiitthaniwa;

eyo vekeekhai enlipelela Okuxiwa paahi, wa Mwaakameliwa okumihiwa.

⁷⁶ Ikanyeryo sootaphuliwa. Nihuupululeliwa hiyo. Ninnoona etthu awo yaahiyale aya. Nyuwo munthuna ovaanyihana ni onyakulihana mwaha wa epyo y'enowa, ni opatiiso wa mmaasini, ni sikina, nyuwo mookhalihani oohoona nave khamunsuwela. Muluku a olumwenku ula ohookhalihani oohoona, wa Yeela, nave nyuwo khamunsuwela. Kahi yooxankela kaakhalanne aka mukattyamiho munci-ene ene voosiis'ula, kiwanaka varyari va ikhittelo iyo!

⁷⁷ Wira maprofeta aya awerye wooniheriwa nihiku nla nookiserya; khakhanle wiiraka, ni Malope, a . . . mwa Niira na Malope.

⁷⁸ Owo iirale, ovira mwa Hoseya, "Kihoottharuxani." Vano nwehe, ti Isarayeli Owo onlavulaawe-no. "Miyo kihoottharuxani," wala moolumo makina, "Miyo kihaathikila, kihaahoma, ni moolumo a maprofeta." Ti siiso Muluku oniwiirihawe atthu Awe. Owo aahaakumiha ilapo sikina. Mwaha wa xeeni? Xoowa Awe oniitha ninno ni nno, Masu Awe. Owo aahaakumiha, nloko Nawe, okhuma mmalokoni. Owo aahikumiha nloko Nawe mmalokoni, ni maprofeta, Masu Awe oolipiheriwa.

Siiso Owo oomukumiha Mwaakameliwa Awe mmuromoleloni, ni Masu Awe; oolaiheriwa ni Malakhiya 4, nihiku nookiserya. Oomukumiha Mwaakameliwa Awe, oomuheka Yoowo okhuma ikereja sikina! Oomuheka Mwaakameliwa Awe!

⁷⁹ Owo aahaakumiha, maprofeta Awe; ni, ni maprofeta Awe, ni Masu amukumihaka Isarayeli. "Mwiivalaanihe ni akina aya."

Nkawehani okathi awo atthunne aya wira ntoko akina aya. Awo yaamurweenle profeta, Samuweli. Owo khwira, "Kootoko okuxa musurukhu anyu? Kootoko wooleelani etthu, mwa Nsina n'Apwiya, yahaatonko wiiraneya?"

Awo khwira, "Nnari, ti yeeyo, ti yeeyo, masi nnakhala vo nimmuthuna mwene."

⁸⁰ Ti siiso ikereja siirale aya. "Oh, hiyo ninnaamini Masu. Ti yoooreera, masi, moosuwela, eniiriwa wira nihaana wira *ela*." Nkincala etthu awo anihimiyaya. Masu aakhalana exariya!

Alipelelaka. Owo ohaathikila okhumela ota, ni maprofeta.

⁸¹ Okathi xeeni ula, munna? Okathi xeeni ula, murumeyi? Munnoona okathi wa nihiku, ni ethooneryo munkhalanyu vathi vaya? Munniwerya wiiwa saana? Munnoona yeeyo?

⁸² Mapuro othene vano, khokhanle muhakalaliho. Atthu othene animwiikhupanyerya, arumeyi ekhuwelelaka. Miyo kaasoma emosa wa i—ipaphelo sa ihapari sookumiherya sinrwa va okereja, epaphelo emosa ya ihapari yoooreera saana. Ni

kinnimusuwela namalepa aya, ni kinnaasuwela atthu. Ni awo atthu ooreera murima, ooreera murima saana, Munna mulopwana ni Munna muthiyana Moore, a *Namuhupi a Orwa Wawe*. Emosa wa ipaphelo sa ihapari sooreeraxa sa vapuwani, *Namuhupi a Orwa Wawe*. Awo ti voorika otthitta etthu ehikhanle wira ti ya, “Mutthuke, nvekele! Mutthuke, nvekele! Murumihe nlope! Mwaakhele...” Akavi ansoma yeeyo? Nyuwo moosuwela. Ennooneya eyo okathi wothene, “Mutthuke, nevekel! Mutthuke, nvekele!” Ti yothene eniuiweya. “Mutthuke, nvekele! Ninrowa okhalana oxa wuulupale! Yookhala etthu yuulupale enrowa okhumelela! Nyuwo othene, nvekele, nvekele, nvekele! Nlelo khinnatthi oxelelaxiwa!”

⁸³ Awo aniirela-ni yeeyo? Awo aniirela-ni yeeyo? Awo antthuna ovenya wuulupale. Awo anookhuwelela, yaaminiki wira onookhala ovenya. Awo atthu ooreera murima. Mwaha wa xeeni yeela? Awo yiirale exeenii? Khasuwenle ovenya wa Mwaakameliwa. Munnona? Eryeene aKristu, awo annoona evurelo ya ewoora, masi khanatthi osuwela ele eniiriwa. Ti yeeyo eniwiiriha awo woona siiso. Awo annisuwela wira etthu ehaana wiiraneya, masi, moone, awo anwehererya wu ohoolo, enrowa orwa, nave yiireiye-ene mpararini mwene mwanyu.

⁸⁴ Eyo etthu emosaru awo yiiralyaya mahiku a khalayi. Awo yaamwaamini Mesiya aarowa orwa. Awo yaanaamini wira aamurwa namahoolela. Masi aari vakhiviru saana ni yaawo, nave awo khiyaasuwenle. Awo khiyaasuwenle. Yaanaamini wira aanirwa namahoola aarowa omuhoolela Mesiya, nave yaathikinle muru awe. Ni yaahimwiiva Mesiya aya, okhala wira yaahilaleeriwa wira yaamukhalahiwa oohoona. Hoseya aahimye siiso.

⁸⁵ Ni Erooho emosaru, yaalavunle mwa Hoseya, yaahilavula mwa Yohani ni khuhimya wira ekereja mahiku ala ookiserya yaarowa okhala “yoohiwar’etthu, ni yoohoona, ni yaarowa omuhela Owo ota wa ekereja.” Awo yaahivonya woona s’eprofeta iye omaliheriwa. Masi, aryeene vaavale, awo annisuwela wira etthu ehaana wiiraneya. Awo khansuwela saana tu. Awo khansuwela saana. Yoolattana saana ni aYuta a khalayi; Lawotiseya oohoona; mihakhu, teyoloxiia, oowali ni Ekereja, oowali saana ni Mutthaka. Nkawehani moota aYuta ale yaaryaya oowali ni Yohani. Nkawehani moota awo yaaryaya oowali ni Yesu, nave Owo oryeene Yoole awo yaahimyaya wira yaamunwehererya.

[Ekaruma yo waacererya oruma enoottherema—Mol.] Kookupali wira noopaha efusiivele. Kinoona wira eyo ennithikileiha ikaravatooro, nave. Khenthikileiha. Vaareera.

⁸⁶ Awo yaari oowali saana ni Mutthaka.

Eniireya, ikuru sinci-ene; khula mmosa a nyuwo othene mwa etthu ya oviha. Khiyaavo enamuna yo okhaliha ekereja

yoolikana oratteene mwa seiyo, vathi wa okathi uwo. Okhala wira, moone, khula mmosa a nyuwo ti BTU miloko mithanu na mixexe ni thanu na tthaaru, voolikana ene. Ni nyuwo khamukilaanthe paahi vo; nyuwo munkumiha oviha voohihiyererya. Yookhala etheku yoophiyerya mu naanaano va wira eriirihe nipuro nla. Masi, ni unitaate woovihiha onikhuma, nyuwo—nyuwo khamunwerya wira.

⁸⁷ Nwehe, oowali! Masi, vano, ntoko aYuta a khalayi, oohoona! Awo ari mwa Lawotiseya. Awo “t’ohiwar’etthu, oothoiwa, ootakhaliwa, nave khansuwela.” Nihiku na mihakhu, miixuttiho suulupale sa teyoloxiia, osoma wuulupale, nto vano awo aakhala oowali saana ni Mutthaka. Khamthuna okhala nnaata ni Yoowo, siiso ntoko saaryaya wu mahiku Yesu a oNasareti aaryawe elapo ya vathi.

⁸⁸ Etthu atthu, nihiku na Nowe, yahaakelenle aya mukalawani, okhala wira awo khanakupaliki mutthaka nnakhala namitthaka. Mwaha wa yeeyo paahi awo yaapweteiye aya, okhala wira awo khayaasuwenle okathi awo yaakhalaya. Awo khayaasuwenle wira Muluku aamuvara muteko ni etampi ntoko Owo saalahenryawe awe wira aamwiira. “Owo aamumpwetexa mutthu, elapo ya vathi.” Owo aahilaleerya eyo. Ti yeeyo Owo aathunne awe ohimya. Ni ti yeeyo Owo onthunawe ohimya olelo enamuna emosaru ntoko okathi ole.

⁸⁹ Masi atthu, ohiya okhala oomucalela Nowe, owo aathokeleliwe ntoko mutthu a mutakhwani. Awo khayaaminni wira owo aari profeta. Nyuwo moosuwela, Yesu, Yoowo Mwaneene, oonileela moota awo yaanyemunle aya mahiku a Nowe, yaamutheiye aya, yaamwiitthanne namathipelela ni sothene. Masi awo khayaasuwenle okathi aya. Awo khayaasuwenle nihiku nene. Awo khayaasuwenle ethooneryo. Awo khayaasuwenle mutthaka ene. Awo khayaamusuwenle namitthaka, masi yaaroomukumiha eriyari aya ni khumutheya. Yesu ohimye wira, “Ntoko saaryaya mahiku a Nowe!”

⁹⁰ Ni Isarayeli elapo awe, ni itthu sothene sookhalihwa vano, ni Mutthaka onookela oratteene, nihiku xeeni ninkhalahu, munna? Nri vayi hiyo?

⁹¹ Awo khayaasuwenle nihiku. Khayaasuwenle. Mwaha wa yeeyo yaavonnye aya woona, okhala wira khiyaasuwenle. Awo yaari ntoko nihiku, oolikanaxa ni atthu olelo, ookhalihwa oohoona ni iyooniheryo sa siyensiya, ni iyeetiheryo sa osoma, ni iseminaariyu sa teyoloxiia. Ni itthu saakhalinhe oohoona nihiku nle, siirale etthu emosaru olelo. Sihaakhaliha oohoona, emaara ekina.

⁹² Ni, nave-tho, wiiveviha, wiiveviha wa mutthaka ni namitthaka! Nowe khaari a siyensiya. Owo khaari mutthu oosoma. Owo aari mulimi, oowiiyeviha, ni mutthaka woowiiyeviha. Yaari yookhweyaxa wa wiixutta waya wuulupale.

Ti siiso olelo! Muluku kweekwe onkhaliha wowiiyeviha, wira aaphwanye atthu anrowa waamini ni omuroromela Yoowo. Ti woovirikana, Mutthaka woovirikana paahi, masi Muluku mmosaru. Vano kintthuna wira mwaamini Yeeyo ni musuwele saana wira Muluku oolavula Yeeyo.

⁹³ Yesu ohimnye wira awo yaahimunyemula profeta Awe, Nowe. Ni ntoko yaanyemunle aya nihiku nle, siiso-tho animwiira Orwa Wawe. Awo yaamwiira etthu emosaru.

Mwaha wa yeeyo Farawo aapwinne awe mphareya. Owo khaatonko osuwela nihiku nawe. Owo khaatonko osuwela etthu yaakhumelela. Owo khaareere wiivaha mwa soopaka sa okathi awe wa siyensiya, wira ateke mittetthe ni muteko wa ipottha. Owo khaareere o—owo khaareerane muteko, wira asuwele oreeriwa waarinaawe, ni khumoomolela profeta namitthaka a Muluku mothakoni. Owo khaasuwenle eyo. Mwaha wa yeeyo itthu siiraneieye aya enamuna siiraneieye aya. Owo khonasuweleke. Vaakhanle wira owo aahisuwela Masu a Muluku oolaiheriwa, wa atthu ale!

⁹⁴ Ni vaakhanle wira ikereja olelo saamusuwela paahi, vaakhanle wira ikereja saamusuwela Masu a Muluku amuhimnye natiri ola a ewoora ela, w'atthu, awo khiyaarowa opweteya.

Vaakhanle wira Amerika aaniwerya osuwela malamulo owo olempe awe, owo khaarowa otthuna waakumiha aBibilia mmaxikolani, okumiha Nsina na Muluku mmusurukhuni wa maluku, ni wiivahererya okhala oororomeleya wa elapo vathi va Muluku. Masi khonsuwela. Mwaha wa xeeni? Owo t'ohoona, oohiwar'etthu. Khonwerya osuwela ephome y'aximiravo ale ooreerexa akhwiye mmapuwani mwaha wa oreeriwa nno. Awo aaliyaliwa; awo ntthupi.

⁹⁵ Masi ookhala Mmosa Ole onuupuwela omwaraxiwa w'ephome ya maprofeta, ehisapo yaatthuneieye wira eruuhiwe Ehapari yooreera ela wa hiyo olelo. Moota ikonto sene akhuuriwaya ni amwatto, ni oriheliwa mulittini, wiikitthanyiwa, opahiwa, okhomeliwa vamwiikimanyo! Muluku onnisuwela eyo.

Ekereja ehaaliyala maprofeta aya. Awo "khanaaphavela-tho awo," annihimya. Masi Muluku onnisuwela wira Owo ohaana okhalana yaawo; Owo onaheka atthu Awe ni Masu Awe. Masi ti enamuna ya khalayi wa awo nihiku nla. Awo khansuwela Eyo. Mwaha wa yeeyo awo aryaaya mmukhaleloni aryaaya-mo. Mwaha wa yeeyo awo aryaaya "oohiwar'etthu, oothoiwa, oohoona, ootakhaliwa, nave khansuwela," okhala wira awo khansuwela okathi onkhalahu. Awo khansuwela.

⁹⁶ Moise, owo aahisuwela nihiku nawe ni wiitthaniwa wawe, okathi omoonalyawe natiri a Masu a Muluku a nihiku nle oolipihiriwa. Owo aahisuwela nto, khusuwela etthu owo aaryawe ni etthu yaari wira owo avare, ni Masu a natiri. Tivo

owo khoova etthu mutthu aahimyawewe. Owo khuuleliwa muru mutthaka awe, onaamwi khula namukuttho ni khula farawo, sothene, khula okhulupale, waavaanyihanne ni yoowo. Masi owo aahisuwela okathi woonalyawe Waarya iwe, Nripu nle na Mooro niithomeiye vatakwarihwani vale, khulavula ni yoowo Masu yaalaiheriwe nihiku nle, khwira, “Miyo koowitthanani wira murowe mwiire.” Owo khoovale wo—woopopiha wuulupale wa mwene. Owo aahirowa waakuxa atthu ale wira akhume, ntoko Masu a Muluku yaalaihenryaya.

⁹⁷ Amoonaka natiri olipihiriwa, owo aahaalikanyherya atthu okhuma waya. Liini? Okathi owo omoonalyawe natiri a Muluku olipihiriwa. Muupuwele, owo aahitthyawa ni teyoloxiia awe; owo aahitthyawa ni wiixutta wawe. Masi okathi woonalyawe Masu a Muluku woonihiriwa, owo oonalyawe Awo olipihiriwa, “MIYO T’ULE KINKHALA,” vano owo khaacanle etthu mutthu ti mutthu aahimyawewe. Owo khoovale etthu Farawo aarowawe omwiiriha. Khoovale etthu akina yaarowaya wira. Aamoovale Muluku paahi, wira vaamuweryaneya owo ohimwiiwa saana Muluku, wala mwa enamuna khata oweryaneya ohimwiiwa saana Muluku. Owo khaawoovale atthu ni etthu yaarowaya ohimya wala etthu yaarowaya wira. Owo aamoovale Muluku paahi, vamanlyawe osuwela wira yaari Masu a Muluku.

⁹⁸ Owo khaawerya osuwela saana moota mutthu ntoko yena aarowawe orummwa iwe. Masi okathi owo osuwenlyawe, ni Masu oolipihiriwa, etthu yaari aya, vano owo khoovale sooruma sa mwene. Vaakhanle wira mwaanisuwela paahi, vaakhanle wira hiyo olelo naaniwerya osuwela paahi! Moise aahisuwela okathi oonalyawe Masu olipihiriwa, oonalyawe mulipiheryo woonihiriwa, Owo aahilikana wira okhale okhuma wa atthu.

Yobi khonasuweleke wira aari Muluku. Vakhalaru wira xetwani onniwerya—onniwerya woophiiheryani waamini wira weeheriwa vakhani munviraanyu—mo ti—ti Muluku khino... onooohukhumuni! Aari Muluku atthunaka omoonihia etthu. Yobi khaasuwenle mpakha owo woona yoowoona. Ntoko Moise; okathi Moise oonalyawe yoowoona, Nripu na Mooro vatakwarihwani, yaahilipihiriwa. Ni okathi...

Yobi, mwa yookoha awe, “Mutthu akhwa vale, onniwerya otthikala okhala—tho mukumi? Kinnoona mwiri okhwa, ni onnikhala—tho mukumi. Kinnoona nluwa okhwa, ni ninnikhala—tho nikumi.” Eyo ti yaari yookoha awe. “Masi mutthu onimookhwa, onoovahererya erooho, owo t’omalalama. Ana awe animoorwa wunla, nave owo khonsuwela. Vaari siiso Nyuwo mukittukuttherye mmahiye mpakha oviruwa Wanyu omala!” Owo khaawerya osuwela mwaha wa xeeni ethutu yaakhwaya ni okhala—tho ekumi, moota nikukhu naakhumaya vamwirini, ni omora, ni okhala vathi, ni otthika okathi wa ephovo. Owo khwira, “Mutthu onimookhwa, nto onrowa woowi? Miyo kinnimwaamini Muluku; masi exeeni emmukhumelela mutthu?”

⁹⁹ Masi nto nihiku nimosa overunya khupacera waarya, itari khupacerya oruma, Erooho khimurweela profeta. Nto owo aahoona orwa wa Mutthu Yoowo aawerya ohela ntata Nawe mwa mutthu natampi, ni Muluku oowaarya, ni olutta ephiro. Vano owo khukhuwela, “Miyo koosuwela wira Nvuluxa aka ookhala! Hata axiitthu epwetexaka erutthu ila, nlelo n’erutthu aka kinoomoona Muluku!” Owo aahisuwela ele yaari ohihimuwa.

¹⁰⁰ Palaamu khaasuwenle Nlaikha mpakha muula olavula ilavulelo. Palaamu khaawenrye osuwela wira Nlaikha naaphwanyaneya mphironi mwawe. Mulaleyi oohoona khaawerya osuwela wira aari Muluku eemenle mphironi, aphavelaka omukoottiha otumiha yoovahiwa awe mwaha wa musurukhu. Nto okathi muula olavunlyawe mwa nsu na mutthu, nto Palaamu aahisuwela wira naari Nlaikha naaphwanyaneya mphironi mwawe, niphavelaka omukhoottiherya owo wira etthu iirawe.

¹⁰¹ Oh, nyuwo miromolelo sohoona! Vakhala wira Muluku onniwerya omurumeela muula, ohinlavula, wira alavule elavulelo ohinsuwelawe, wira amusuwelihe murumeyi wira owo ori ota w’ephiro, Owo khokhanle omurumeelaka mutthu wira aire etthu emosaru? Atthu oohoona!

¹⁰² Vaakhanle wira Akhabi aahisuwela nihiku nawe paahi, owo khaarowa wira ampwapwenle profeta, Mikaya, ni Masu a Muluku a natiri wa yoowo.

¹⁰³ Okathi Akhabi aaphwanyaneyawe iwe nihiku nle, owo ni—ni Yehoxafathi. Ni okathi yaarinaya maprofeta imiya xexe iwe elaleeryaka, yiiraka, “Welakani! Sothene siri saana. Akhabi, nyuwo munkhala mutampini. Nyuwo munipakenle muromolelo muulupale! Hiyo n’atthu aalupale. Hiyo na metuko muulupale. Hiyo nri va, hiyo n’anamukuttho imiya xexe owiixuttihiwa, ahiiso maprofeta. Hiyo n’atthu imiya xexe, ooxuttihiwa mwa Masu ni teyoloxiia. Hiyo ninnisuwela sothene sa Yaawo.”

¹⁰⁴ Tivo, vano, ela yaahooniherya wira awo khayaasuwela sothene sa Yaawo. Mulopwana awo yaamwiitthanne aya mulolo, mwa nloko awo ahinatthi, Eliya, profeta eekeekhai a Muluku, aahilaleerya, “SIISO ANIHIMYA T’APWIYA, ‘Alapwa anoolata ephome anyu, Akhabi!’” Munnona?

¹⁰⁵ Masi anamukuttho ale, maprofeta oopakiwa ni mutthu, yuupuwela wira yaahikhalana sothene soothokihiwa oratta-ene. Awo yiirale, “Tithi Abrahamu...ahiiso, Tithi Akhabi, welakani! Apwiya ari ni nyuwo. Nyuwo mookhalana Yolempwa, okhala wira Muluku onvanhe Isarayeli elapo ela. Ti ya Isarayeli. Welakani! Apwiya ari ni nyuwo.” Oh, wulu!

¹⁰⁶ Masi, moosuwela, Yehoxafathi, mmosa ahaaitakanxale mutampini ntoko Akhabi, owo oona itthu voovirikana vakhani. Owo iirale, “Khokhanle mukina?”

107 Owo khwira, “Nookhalana mmosa va, masi kinnimunyokha.” Munnona? Muluku aaira exeeni? Aakumihaka atthu Awe, ni profeta, emaara ekina. “Miyo kinnimunyokha. Owo khoniira etthu woohikhala okipwapwela okathi wothene. Ni moosuwela wira ka mutthu muulupale. Miyo nkaarowa okhalana eseminaariyu ela nno kahaari mulipa-oowaamini muulupale. Kookhalana axilopwana ooxuttihiwa oratteene. Miyo kinaahela vale ni iliivuru ni aBibilia, ni sothene sikina, wira kiixuttihe yeela. Ni koosuwela wira awo atthu aalupale.”

Masi vaakhanle paahi wira Akhabi aahisuwela ole aari mutthu owo, mwaamulopwana ola oowooneya othaaleliwa, mwaana a Yimula, eemenle vale, omuleela wira, “SIISO ANIHIMYA T’APWIYA,” owo khaakhalakhala airaka yoovonya ele yoowiiva owo iiralyawe. Masi owo aampwapwenle Mikaya. Owo khaatonko wira. . .

Oh, atthu, musuwele okathi munkhalanyu! Nwehe etthu ekhumelenle. Nwehe etthu elaiheriwe. Musuwele nihiku munkhalanyu.

108 Vaakhanle wira miromolelo sa ekereja olelo saaniwerya osuwela paahi mwaha wa xeeni awo anlamuliwaya, ni atthu aya antthyawaya mwemmo, ntoko Isarayeli okhuma wEjitu! Vaakhanle wira miromolelo saamuhiya paahi opwapwela ifiita iyo, nave khunaiwa! Ni nyuwo, mulaleyi, muniwa efiita ela, nwiriyane! Vaakhanle wira mwaanisiuwela paahi okathi onkhalanyu, vaakhanle wira mwaanisiuwela paahi ethooneryo y’okathi, nyuwo mwaamona mwaha wa xeeni atthu antthyawaya miromolelo iyo. Erooho y’Apwiya, yiitthanaka! “Khaavo onwerya orwa wa Miyo,” ohimnye ti Yesu, “vahikhanle wira Atithi Aka anoomuruuha. Ni othene ale Atithi, okathi ovinre, akivahalyaya, animoorwa.”

109 Ntoko mwamuthiyana veehimeni, ni namukuttho, moota awo yaarisaa oovirikana! Yoolempwa eri vaxirini v’olelo, emaara ekina. Awo annoona eyo, masi khansuwela.

110 Vaakhanle wira aYuta yaahisuwela paahi ethooneryo ya natiri ya Mesiya aya, voolikana ni profeta aya ookiserya! Malakhiya 3 ahimnye wira, “Moone, Miyo kinoomuruma namitthaka Aka ohoolo Waka, ni onootthokiha ephiro.” Ni yaanihimya wira yaamuwehererya Yoowo.

111 E—elikanelo xeeni yoolikana mpakha o—olelo! Awo anihimya wira anwehererya etthu wiiraneya. Ikereja sothene sinoovekela ni otthuka, ni siniira, “Vano nrowe nivekele. Nrowe nithukumane. Nihaana okhalana etthu yuulupale eniiraneya. Hiyo noosuwela wira yookhala etthu yuulupale ehanle wiiraneya. Ekereja ehaana wiilikanyiha.” Mwaha wa yeeyo awo anvekelaaya.

112 Yaari mwaha wa yeeyo awo yaavekelaya wu. Nto vale khurwa Yohani Mpatisa. Okhala wira, owo aahikhootta

iseminaariyu saya, okhala wira owo iirale voovirikana n'ile axitiithi awe yaamuxuttihale aya. Owo aakhumme mothakoni oohisoma. Owo aakhumme ahirina mukala woorukunxiwa, ntoko yaarowaya ohimmwa olelo. Owo aakhumme ohirina nikuttha na teyoloxiyya. Masi owo aarwiiye, asuwelaka ni natiri a Muluku wira aari wira owo amulaleerye Mesiya.

Owo iirale, "Owo omphwanyaneya eriyari anyu naanaano va." Ni yooniwa wira aari mulolo, okhala wira owo khaakhumme muxikola mwaya. Yoolempwa yaari vaxirini, ni awo khiyaasuwenle. Awo yaahimya wira yaanimulipelela Mutthu ene yoowo orwa; ni Owo aari eriyari aya ene. Ni awo khiyaamusuwenle Owo, anaamwi yaahimya wira yaanimusuwela.

¹¹³ Voolikana saana, ntoko aYuta, awo muryaaya-mo, ntoko Amalapo ni awaya, okhala wira yoolaleeriwa etthu emosaru yeeyo, etthu emosaru. Yaahimya wira yaamulipelela Yoowo. Masi miromolelo vano okathi w'Amalapo, wa Lawotiseya ti sohoona ntoko awo yaaryaya, okhala wira (mwaha wa xeeni?) yoolaleeriwa wira yaamukhala. Ehaana wiiraneya.

¹¹⁴ Vaakhanle wira Isarayeli aahisuwela paahi ethooneryo awe, awo yaamwiira esuwenle wira okathi wo okhumelela wa Mesiya waahikhuveela. Awo yaasuwenle-ru!

Moosuwela, a—awiixutti yaahimuhimeerya yeeyo Yesu. "Xeeni alipa a ikano ohimyaka, wira, 'Eliya ohaana toko orwa?'"

¹¹⁵ Nto Yesu khwira, "Eliya ohoorwa, nave awo khuhimusuwela. Owo aahikhala vaava, ni aamwiiva. Awo yiirale voolikana ele Yoolempwa yaahimmye aya wira yaamwiira."

¹¹⁶ Vaakhanle wira awo yaahisuwela paahi, wira "namathipelela" ole aapwapwela itthu sothene soowaanyiherya awo yiiraaya, aapwapwela sothene awo yiiraaya. . . Owo iirale, "Nyuwo anawoothe! Muhipacerye o. . . Inowa soothepya, nloko na ivili, taani owiixuttihaleni otthyawa oviruwa onrwa? Muhipacerye wuupuwela mwa nyuwo, 'Hiyo nookhalana Abrahamu ntoko tiithi ahu. Nookhalana *ela*, *ele*, wala *ekina*.' Maana kinimooleelani, Muluku onniwerya ni maluku ala otatuxa okhala aana a Abrahamu."

¹¹⁷ Muhipacerye wuupuwela wira mookhalana Mwaataano wa Molumwenkuni mmatatani mwanyu, ni murina mamempuru oowaraxa oratteene a yeeyo. Muluku onniwerya ni makhule a munloothoni nno waavenxa aana wira emalierye Masu Awe; anamittompe, anamweettasa, anamuhapaliwa, anacuuku. Owo onniwerya wira yeeyo. Owo nlelo Mulukuu.

¹¹⁸ Miromolelo sohoona, ntoko Isarayeli ohoona, oowaili oolaleeriwa okhala siiso. Kiniwoonihani ilikanyihyo, mpakha kiphaye nipuro nla kintthunaaka ophiya vano. Ookhalihwi ohoona, ntoko mi—miromolelo s'Amalapo sa Okathi wa Lawotiseya, ti sohoona olelo ntoko awo saaryaya okathi ule.

119 Okathi wa Lawotiseya ohaana waakhela Mutthaka! Malakhiya 4 ohimnye wira awo yaamwaakhela.

Masi anwehererya exeeni? “Muromolelo ahu onookumiherya Eyo. Eyo yaahirwe ovira mwa hiyo, aPatista, maPrespiteriyaano, a—Asempeleya, Maunisista, yookhala e... hiyo naahikumiherye-ru Yeela, kehiyo ekeekhaii.”

Etthu emosaru yaahiira nihiku nle! Ni yaahirwa khurowa, nave khayaasuwenle. Awo khayaasuwenle eyo, enaamwi yaamalihenrye Masu othene. Yesu ohimnye wira, “Yaamwiirihale ntoko yaatthuniwaya wira iirihawe. Siiso anoomwiirihla Mwaana a mutthu,” Owo aamukhoottiwa.

120 Vano nwehe, etthu emosaru vano mahiku a Amalapo, voolikana ni Soolempwa soolaiheriwa sa Malakhiya 4.

Yeeyo, Yesu ohimnyawe, “Yoolempwa yothene ti yowuupuxeriwa, ni khiyaavo emosa ya Yeeyo ehikhanle omaliheriwaka.” Khiyaavo enamuna yo okhoottiherya Yoolempwa omaliheriwa. Sothene sihaana omaliheriwa. Ni Yesu ohimnye wira yaamwiiraneya. Ni va hiyo ninnoona wira ehiiiraneya. Hiyo ninnoona.

121 “Ohokoloxa” exeeni, mahiku ala ookiserya? Nyuwo axinna a muromolelo, nwiriyane! Ohokoloxa niira na pentekosite, noopacerya. Ntoko saaryaya wopaceryani, siiso Eyo enoohokoloxiwa Nlope na niira na Isarayeli nihinatthi oruma. Ehaana ohokoloxiwa! Ehaana okhala etthu wira yiire. Malakhiya 4 ohimnye wira aamuhokoloxerya Waamini w'axitithi, w'ana, etthu yaarowa okhumelela.

122 Vaakhanle wira Isarayeli aahimusuwela Mesiya aya, ethooneryo yoolaiheriwa, awo khiyaarowa okhala varyaaya olelo. Awo yaa... Masi yahiirenle-ni? Ti yowooniha othunku. Awo yahiirenle-ni? Okhala wira Muluku aahimnye wira awo khiyaarowa wira. Akavi anaamini yeeyo, yiire, “Amen.” [Muthukumano oniira, “Amen.”—Mol.] Muluku ohimnye wira awo khiyaarowa wira.

Nto ti Muluku mmosaru yoowo ohimnye, Okathi wa Ekereja ya Lawotiseya, wira eyo yaamurowa wiiraneya, ni eyo eri va ohoolo waya. Awo akhanle wiiraka sayi etthu p'itthu woohikhala wira yeeyo?

123 Vaakhanle wira yaahisuwela paahi ethooneryo yoolaiheriwa ya Mesiya, ethooneryo ya Mwaana a mutthu! Owo aarwiye mwa nsina na Mwaana a mutthu. Vano, Owo aari mwa nsina, moovirani wa Okathi wa Pentekosite, mwa Erooho Yoowaarya, Mwaana a Muluku. Vano, etthu yootharelana ti eMileeniyu, Mwaana a Davidi. “Aana” araru, Muluku mmosaru. Mmosaru, “Tithi, Mwaana, Erooho Yoowaarya,” Muluku mmosaru. Mwaana a Davidi, Mwaana a Muluku... Mwaana a Davidi, Mwaana a mutthu, Mwaana a Muluku, ti Muluku

mmosaru okathi wothene, mwa miteko miraru soovirikana paahi.

¹²⁴ Siiso “Tithi, Mwaana, ni Erooho Yoowaarya” kahi aMuluku araru, masi Muluku mmosaru mwa wakathi miraru, miteko miraru, ntoko Tithi, Mwaana, ni Erooho Yoowaarya.

Masi, ntoko olelo, oohoona mwa ilimalelo ntoko saaryaya okathi ule, oohoona mwa ilimalelo, awo khanoona ela. Xeeni ohiweryaka woona? Awo khankhalakhala yoonaka. Muupuwele, eyo ti SIISO ANIHIMYA T’APWIYA.

Muniira, “Munihimerya-ni yeeyo nto?”

Siiso ntoko Yohani saahimye awe, siiso ntoko akina a awo yaahimale aya. Ookhala mmosa onvirikanyihwa va ni iwe, orina okumihiwa. Oh, ipwittipwitthi sa Muluku, mwiwe Nsu na Muluku! “Ipwittipwitthi Saka sinniwa Nsu Naka.”

¹²⁵ Muthiyana veehimeni aahisuwela nihiku nawe, ni ethooneryo ya Mesiya. Owo aari ni mukhalelo wootakhala. Owo khaatthuna opwetexa okathi ni ikereja iye sa khalayi, enamuna iyo siiraaya. Awo yaakhala mwa khula enamuna, ni, itthu awo yiiraya, owo khaamini ethiru ele. Masi owo aanisuwela wira nihiku nimosa aamurwa Mmosa. Owoooniha othunku ole vale, arowaka omuro; owo aahiphwanya Yeele owo aaphavelawe, okathi Owo opacenryawe omupululela esiiri ya mmurimani mwawe, khumuhimeerya etampi owo aakhalawe-mo.

Owo iirale, “Napwiya, kinoona wira Nyuwo mwa Profeta.” Vano, awo khayaakhalanne hata mmosa mwa miyaakha imiya xexe. Khwira, “Kinoona wira Nyuwo mwa Profeta. Ni koosuwela wira Mesiya arwa vale Owo onimwiira itthu iya.”

Owo khwira, “Miyo ka Yoowo.”

¹²⁶ Owo aahisuwela. Khuwaakhanle-tho ohoverya, “Munwerya sayi Nyuwo wooniherya yeeyo?” Yaahoonihiriwa. “Mesiya arwa vale, ela t’itthu Owo onrowaawe wira.”

Ahe, vakhala wira owo aahiwerya osuwela ni Soolempwa, khaninwerya hiyo osuwela Waarya wa makaaripi ni ethooneryo ya olelo?

“Noosuwela wira Mesiya arwa vale Owo onoonooniha itthu iya sothene. Owo onoonileela yeela.”

Owo khwira, “Miyo ka Yoowo kinlavula ni nyuwo.”

¹²⁷ Khaakonhe-tho. Owo aahirowa, ni aahaaleela atthu, “Murwe, moone! Owo ori va.” Khuwaakhanle-tho ohoverya wa yoowo. Yaahimaliha mwaha, okhala wira owo aahisuwela nihiku aakhalaawe. Owo aahisuwela.

¹²⁸ Siiso aahisuwela Natanayeli, muHeperi muulupale, okathi voonalyawe ethooneryo ele ya Mesiya yaalaihieriwe iwe; khivaacali anamukuttho akavi, itthu kavi sikina.

Eyo yiirale exeeni? Yaahaakattamiha anamukuttho, owoona athu ale ahiyaka ikereja ni arowaka. Owo iirale, “Akhala a nyuwo onrowa okhala vamuthukumanoni Vawe, onimoomoliwa. Nnimoorihelani naanaanoru ota wa muromolelo.”

129 Siiso t’iryaya olelo. “Nnimoohelani ota wa mutthenkeso ahu mwarowa-ru vamuthukumanoni vawe.”

130 Munnimuupuwela mulopwana ahoona? Atithi ni ame awe khayaawenrye hata waakhula; awo yaanoova. Okhala wira, awo yiirale, “Khula mutthu aarowa omoona Yesu, ahiiso—wala aarowa okhala mithukumano Sawe, aamoomoliwa.” Masi, mulopwan’ole oohoona aaniwerya olavula mmansawe, ole aatonko okhala oohoona aaniwerya nto woona.

131 Miyo, kaatonko okhala oohoona, kinniweya woona vano. Miyo, kahaasuwelela itthu iya, Ela koosuwelihiwa ni Erooho Yoowaarya. Muhiye, miromolelo, okhala wira awo annoorwa, khula enamuna! “Miyo kathomeiwaru mulaponi, kinimwaaruha athu othene wa Miyo.”

132 Natanayeli aahisuwela. Owo aahisuwela.

133 Tthiri ntoko ikeekhai sa Soolempwa sa Moise, Masu oolipihiriwa. Moise aahisuwela wira ole aari natiri a nihiku, okhala wira yaari Yoolempwa, khivaacali moota yaaryaya yootikiniha. Owo iirale, “T’ani okhanlyaka waahimeerya... Miyo kinimwaalelela wira kihoona Waarya ottuli wothakoni nno. Kikhanle waahimeeryaka sayi vano wira waahikhala Waarya ottuli nno, nto Waarya nno ottaiwene nno, nto Waarya nno okihimenrye wira kirowe iwe?”

Owo khwira, “Vekeekhai, Moise, Miyo kinookhala ni nyuwo.” Ni kahi paahi...

134 Owo khaaisoonihenrye Mmansawe wu wEjitu; paahi ni miiriirya ni ithoonyeryo. Masi okathi Owo aathukumanne awe ni othene vamosa, Owo aahaakhumelela-tho, ni ahilipiherya muteko wa Moise ohoolo w’Ale oothanliwa ni oowitthaneliwa okhuma. Okathi profeta ole aataphunle awe elapo ele ni khwaaroiha nipuro khata, vano Nripu na Mooro naahikhumelela-tho vasulu va Mwaako Sinayi.

135 Mulikanyihe yeeyo ni olelo. Hmm. Amen! Attotopeliwe Muluku! Ti yoovikana ekumi wa miyo. Munnuwelo aka onipacerya waatta, ni kinnoona okathi wa soohifayi ni enamuttompe simwareelaka mulaponi n’itthu siiso, vano kinooweha ottuli ni woona ekhumelenle. Murim’aka onootupha mwaha wo otthapa, kisuwelaka wira nuuvira okathi vakhani empa ela ya vathi yo okhala-mo enookurumuwa, masi kihaana emosa enlapelela epantte ekina. Miyo kimpavela waakumiha athu, waakumiha nwa itthu iya n’itthu, waakumiha; wira kiwoonihe, ni Soolempwa, wira Muluku omphwanyaneya vale; ni olipihiriwa wa Nripu na Mooro, yeeyo athu imiya sene

ni ikonto sene anoonakaya, ni hata nookumihiwa elatarato, khalayi, ni kaamera, emaara ni emaara, wira yooniherye yeela.

¹³⁶ Anamatakiherya anoovenya. Vekeekhai, ehaana wiiraneya. Anamatakiherya yaahivenya nihiku na Moise khwiira etthu emosaru. Muluku khwira, “Mwiivalaanihe, Moise. Muhikhale vakhiviru ni yaawo. Miyo kinimwaamirya.” Nto olumwenku khwaaphwanya. Ni ti siiso olelo; antthikela molumwenkuni, olavilavi ni musurukhu ni sothene sikina. Munnona?

¹³⁷ Ethoonyeryo ya Yoolempwa ya Moise! Owo aari—owo aari profeta ole muulupale a Muluku aaronwe iwe wira aavuluxe, ni awo khusuwela eyo. Awo yaahisuwela ethoonyeryo. Owo aari natiri oolikana a Yoolempwa, oolipiheriwa.

¹³⁸ Yesu aari natiri ole a Yoolempwa, aalipiheriwe wa muthiyana. Ahiiso, Owo aari Otaphuleliwa. Yesu aari Otaphuleliwa wa Yoolempwa. Ekumi Awe Yoowo yaahitaphulela Yoolempwa.

¹³⁹ Khamunoono Mutthaka wa ewoora? Munniwerya osuwela vatthu varyaahu? Mutthaka ene mmansaya, mwa Yoolempwa, onnootaphulelelani nyuwo okathi onkhalaahu. Iwo p’utaphuleliwa.

¹⁴⁰ Yesu aahimuhimeerya Isarayeli, “Vaakhanle wira mwaahisuwela paahi nihiku nanyu.” Emaara emosa, okilanthene oMwaako Olivera, Owo aahiweha, khwira, “Yerusalemu, O Yerusalem!” Owo aahinla. Owo aahiweha vathi. Owo aahoona.

Kahi ni elikanyiheryo, khino, enamuna. Ohiyu umosa, voosiisu umosa, voophiyaka ewoora ya namuloko, okathi woonalyaka ekerej’eyo namuttompe. Muhina mmurimani mwanyu, nyuwo munoono Erooho Yoowaarya emoraka maithori.

“Yerusalemu, O Yerusalem, imaara kavi Miyo kitthunne aka woophuramwelani ni mapupha. Masi nyuwo mwiirale exeeni? Muwiivale maprofeta kooveleelihenryakani. Nyuwo muroowiiva.”

Ni Mitthaka sinveleeliheriwaka ekereja, olelo, sihiiviwa ni makano aya a muromolelo. Yoolempwa ehiiviwa ni makano aya. Yesu ohimmye wira, “Vaakhanle wira mwaahisuwela paahi nihiku nanyu! Masi, khereere okhala ottaiwene vano, khivareere oxa vano.” Ti siiso ni ikereja!

¹⁴¹ Miyo tthiri kinnaamini, ni murima wothene, eyo eri ottaiwene wa ovuluxiwa. Voohicala exeeni muntthunanyu wuupuwela wa yeela, owo muupuwelo anyu. *Ola* ti wawaka. Munnona? Khamurina okhalanaka muupuwelo aka. Masi kinnaamini wira eyo eri ottaiwene wa ovuluxiwa, ni t’enkhalakaaya, mwa miyaakha mithanu wala mithanu na mosa sivinre. Miyo kinnuupuwela. Nyuwo munnuupuwela oChicago. Nwehe etthu ekhumelenle okhuma vaavo, nto nwehe eyo otthikela yiiraneyaka. Munnona? Muupuwele, nsina naka

nri ottaiwene na yeeyo. Niphariheliwe vaavo. Eyo ti SIISO ANIHIMYA T'APWIYA. Moone vakhala wira owo khokhumme, onootthikela.

¹⁴² Nkawehani 1933, moota enihimyaya wira athiyana yaarowa wiiraka mahiku ala ookiserya. Moota ehimmye aya wira aththu... Moota Mussolini, moota owo aarowaawe ophiya woomaleloni wawe. Moota Hitler aarowaawe ophiya woomaleloni yootikiniha. Moota ismu tthaaru saarowaya okhala komunismu. Moota maakina yaarowaya orwa, elikanaka ni nooce. Ni moota athiyana yaarowaya owara ikuwo ni yaarowaya olikana ni alopwana, ni hata ikuwo saya sa muhina; nto vookiserya yaamuphiyerya owara makukhu a efiiku, siiso, mwa yaawo. Moota eyiirelo yoohureya, moota yaarowaya wira nihiku nla. Nkawehani etthu awo aniirakaya. Ni eri ohoolo wanyu, nto.

¹⁴³ Vaakhanle wira athiyana aKristu yaaniwerya paahi... athiyana aniitthaniwa aKristu yaaniwerya paahi osuwela, yaaniwerya osuwela wira erooho yoohureya mwa yaawo ti ya xetwani, wira yaametthiheke maihi aya. Xetwani t'itthu emosa paahi aarowa wira eyo. Eyo ti yoovirikana ni Masu a Muluku wa nyuwo, siiso ntoko saaryaya omatta wEdeni. Awo yiirale exeenii? Vaakhanle wira yaaniwerya paahi osuwela! Awo aneererya wira, "Oh, mulaleyi ule mwaamukhaani santu oophirikeya, ahimya!" Nkihiyo miyo. Nkinoohmeeryani etthu yo wira. Miyo kinihimya Masu paahi. Vaakhanle wira awo yaaniwerya paahi osuwela wira owo ti xetwani.

¹⁴⁴ Awo aniisiitthana aKristu. Yesu ohimmye wira, "Munwerya sayi okiitthana Miyo, 'Pwiya,' nave khuhinaira itthu kinihimyaaka wira mwiireke?" Awo khakhanle okhalaka aKristu. Miyo nkihiyo mphuki aya, masi kinihimya paahi ele Masu ahimmye aya. "Munwerya sayi okiihana Miyo, 'Pwiya,' vano nto khuhinaira itthu kihimmye aka wira mwiireke?" Ni Masu othene va ti wiisuupulula wa Yesu Kristu. "Munikiitthana sayi Miyo, 'Pwiya,'"

¹⁴⁵ Vaakhanle wira awo yaaniwerya paahi osuwela wira owo xetwanii, erooho ya ohureya. Athiyana amosa-amosa ooreera murima ota iwo...

¹⁴⁶ Miyo kinoona wira nla nipuro n'ohifayixa kitonko aka woona kookhalaru, Jeffersonville, Indiana, vanaasiwa athiyana oohiwara etthu. Kaahikhala oHollywood. Kinnikhalaka mapuro othene. Kaahikhala olumwenku wothene, ni kihoona inamuna sothene sa itthu soonanara. Kihoona oParis. Kihoona oInklateera, ekhanle yuulupale ya sothene iyo.

¹⁴⁷ Kinoona wira Inklateera waampwinihiwa nihiku nlo vathi va ephareya. Onniphwanela; soonanara, ottakatta, oohiloka! Nlo ti nlitti na efoosa na molumwenkuni, aththu ootepaxa ohikhala a

yooilempwa, ni ookhoota kitonko aka owoona kookhalaru. Eyo ekhanle siiso okhala wira erookhoota Ekeekhai.

¹⁴⁸ Billy Graham ohimye wira aahaana waakumiha amwaar'awe mupaarikhini; itthu s'ekhapa siiranyaka alopwana n'athiyana, amiravo n'axiruusi, oparkhini vaavale vale, vaatthuni. Eyo erookhala nlitti na foosa; siiso t'okhanlyawe Faransa, siiso t'okhanlyaya olumwenku wothene. Ni siiso t'okhanlyawe Estadu Unidu, akhalaka muhooleli a sothene saya!

¹⁴⁹ Nkawehani olelo. Animwaametthiha maihi, waawara akaputtula, ikalsa, onvura sikaro, ni yiisiihanaka alipa-oowaamini. Nyuwo khamunsuwela, munna muthiyana, wala muthiyana... Kintthuna ohimya wira, kileveleliwe, kahi munn'aka; oniira etthu siiso. Khamunsuwela wira owo xetwanii? Masi exeeni...

Ntoko aYuta a khalayi, khamunrowa waamini Masu oolipiheriwa okathi Awo anooniheriwaya wa nyuwo. Nyuwo munvarelela ilimalelo sanyu sa miromolelo sinihimya wira sothene siri saana. Nyuwo munoolavula ilavulelo, munootupha-tupha, munniipa muroohoni, ni omettha maihi anyu. Mwaamuwerya omuthokelela muKristu airaka yeeyo?

Miyo kinniwoonaka axetwani, kinniwoonaka akhwiri, kinniwoonaka olavula ilavulelo ni otaphulela, ni otupha-tupha ni wiina muroohoni; owurya ephome munikarakasani na muru wa mutthu, ni otakhaliha Nsina na Yesu Kristu.

¹⁵⁰ Nyuwo muniira, "Miyo kiniira mpantta wa ekereja. Aleluya! Avuwihiwe Muluku! Miyo..." Muniira mpantta wa xeeni?

Ekereja ti Masu! Nto Masu anihimya wira, "Ti yoowuuliha muru nyuwo wira yeeyo."

Nyuwo nikhuru na aFarisi oohoona, muniweettiha anamwane awo oowooniha othunku mwaaroihaka omooroni siiso; okhala wira munimoova opwetexa ettikitti ya yolya, ni woomoliwa muromolelo anyu mwapacerya-ru wira etthu ya Yeeyo. Wuuliha muru, nyuwo namirima miili! Muuliweke muru mwaha wa yeeyo. Moonaka ewoora yaattamelaka siisa, nto nyuwo munoohiya Masu a Muluku mwaha wa ilimalelo sanyu. Muneererya sayi, nyuwo oohoona!

¹⁵¹ Bibilia khonihimya wira mookhalihiwa oohoona? Khamunwerya osuwela wira mwa oohoona? Bibilia ohimye wira ti mwaaryaanyu. "Ni nyuwo mwa oohiwar'etthu, oothoiwa, ootakhaliwa, oohoona, nave khamunsuwela." Okathi nyuwo munuupuwelanyu wira murina ekereja yuulupalexa mpooma, ni muniira *ela, ele*, wala *ekina*; ni Bibilia ohimye wira nyuwo mwa oohaawa sinweryaneyaaya okhala, ni mwa oohoona. Ni Owo nlelo eemenle vamukhora, atthunaka wootumiheryani murette wa mmaithoni; kahi wootumiheryani, masi woovahani, nave nyuwo khamuntthuna waakhela. Emmaliherya Yooilempwa.

152 Nihiku xeeni munkhalaanyu, atthu? Munnisuwela okathi, munnisuwela ethooneryo?

153 Vaakhanle wira yaaniwerya paahi osuwela, athiyana awo, wira owo ti xetwani. Ti xetwani oohureya, mwa nsina n'etiini. Owo kweekwe onkhalaka siiso. Owo onnimurweela khula profeta, owo onnimurweela khula musuweli, owo hata aahimurweela Yesu Kristu, ntoko mutthu natiini. Ni Bibilia ohimye wira owo aamurowa “okhala oolattanaxa mahiku ookiserya,” hata aPentekosite, “ni yaamuwoototha ale oothanliwa,” ookhuma ekereja eyo ya Pentekosite, “vaakhanle wira yaaniweryaneya.” [Nipuro vahiitthu mufiitani—Mol.]

154 “Vakhani,” Owo oohimya, “okhala wira mukhora ti woophunyeya ni ephiro ti yoorika, vano ale amphwanya eyo ari vakhani. Tthiri ntoko saaryaya mahiku a Nowe, yaawo atthu athanu n'araru yooonwe aya, siiso enookhala orwa wa Mwaana a mutthu.” Muupuwele yeeyo! Nihiku xeeni ninkhalaahu? Nyuwo munnisuwela ewoora ene, munnisuwela nihiku nene?

Miyo kinookuxa okathi anyu munci-ene, masi kihaana-tho minuutu vakhani. Munnona?

155 Yaametthihaka maihi aya. “Ahe,” awo aniira, “ekerej'ahu khenxikha eyo.” Moosuwela mwaha aya? Awo khaanoona.

“Khiva mulattu omettha maihi.” Bibilia onihimya wira wookhala! Ethu yoowuuliha muru nyuwo omettha maihi anyu ni ovekela.

Nyuwo muniira, “Ahe, muthiyana ohaana wiikhuneela.” Ni Bibilia ohimye wira “maihi” ti yowiikhuneela awe. Kahi exapheyo; maihi awe!

156 Ankhi Moise iirale, “Kinrula exapheyo aka ohiya ixapattho saka”? Yaamwiira ehivanr'etthu. Muluku iirale “ixapattho,” nto Muluku aatthunne ohimya ixapattho.

Owo iirale “maihi,” kahi exapheyo! Avuwihwe Muluku! Owo emusivenle yeeyo, kookupali. Attotopeliwe Muluku! Owo onthuna paahi ohimya ele Owo onihimyaw. Yooolempwa kehiyo yo otaphuleliwa voomeekha. Khenihimya wira ti ya muromolelo anyu paahi; Enihimya paahi ele Eyo enihimyaaya, ni Owo ti mutaphuleli.

157 Muniira, “Miyo kinnimusuwela muthiyana oniira yeeyo.” Nkincala etthu nyuwo munsuwelanyu. Kinsuwela ele Muluku ohimyaw wa yeeyo. Mwiire ntoko sintthunanyu.

158 Vaakhanle wira awo yaaniwerya paahi osuwela exeeni ila, muhano. Uh! Vaakhanle wira mwaaniwerya osuwela! Ahiiso, “muthiyana,” kahi muhano.

159 Kaahoona nipawe, kikhumaka oBlue Boar, iwe, kookupali wira ti Ephiro ya Neethanu iwe, nipuro nimosa na saravexa, naahimya wira, “Meesa a ahano.” Miyo khweemela vale paahi; khwira, “Nyuwo khamunatoko okhalana mmosa.” Muhano

khonvolowa nipuro ntoko nlo. Muthiyana aamuwerya, masi kahi muhano.

¹⁶⁰ Mooweha wira, omora w'olumwenku opacenrye ni ohureya wa muthiyana? Moosuwela wira ori wira omalele enamuna emosaru, ohifayi wa muthiyana? Ni ekereja, enthoonyeriwa, ni muthiyana? Ekereja muthiyana, naalavulaka mwa erooho.

Mwaakameliwa nave muthiyana, naalavulaka mwa erooho.

¹⁶¹ Ohifayi w'ekereja, moota eniirakaaya! Nkawehani soowoona, nkawehani itthu, moone soowoona hata Muluku onvahaawe, ni yoowoona eyo ti y'ekeekhai. Kookhalana Bibilia aka vamurimani vaka, nyuwo atthu mufiitani; muthukumano onniwerya woona. Miyo kihoona eyo! Muluku Oowerya sothene onnisuwela wira eyo Ekeekhaii. Nkinatoko osuwela eyo mpakha naanaano va. Eyo vo, "yoohiwar'etthu, nave khensuwela." Eyo yaaviriha okathi wooreera paahi. Eyo eri vo.

Masi okathi Mwaakameliwa ole mwamukhaani orwiyaawe, aari oovirikana. "Alfa ni Omeka!" Uh-huh.

¹⁶² Xetwani onniira yeeyo. Masi ntoko aYuta a khalayi, awo yona Masu. . .

Ni Yesu aahimeenrye Awawe, Owo aahimeenrye ela awiixutti Awe, "Mwaavavye Soolempwa. Nyuwo, nyuwo moosuwela, wira murootikinihiwa mwaha wa Miyo ni muteko Aka. Mwaavaavye Soolempwa. Mwa Seiyo munuupuwela wira munoophwanya Ekumi Ehinimala, ni Seiyo sinnikikhalela onamoona Miyo, Iyo sinnooleelani ole okhanle Mutthaka Aka. Mwaahiweryeke okaamini Miyo, mwamini Masu Muluku onootaphulelaaweni."

¹⁶³ "Khanimmutthuna mulopwana ola oruma vasulu vahu. Nookhalana anamukuttho ahu yoohi, ni sikina." Mwiireke yeeyo weeso, ti yeeyo tu ekhanle ohimmwaka. Khivareere oxa, khula enamuna. Munnona? Ilimalelo sa miromolelo sinihimya wira khiva mulattu, awo anniiwa eyo. Awo anamputi wiiwa. . . Nyuwo munnaamini ma—masu a—a mutthu ovikana Masu a Muluku. Awo khansuwela. Ikereja olelo khasimmusuwela Timoteyo Aneili 3. Vakhala wira nyuwo. . .

¹⁶⁴ Kinniwoona akina wa nyuwo mulepaka Soolempwa. Vano, iya ti Soolempwa kinihimyaaka okhuma vaava va. Vaavo, yairaneya mutthu okikhaliha oocaliwa ni yeela, wala okitharimula mwa yeela, kinoowerya owooniha Yoolempwa ya yeela. Munnona?

¹⁶⁵ Awo khammusuwela Timoteyo Aneili 3, vaavo Owo ohimmye awe wira, "Mahiku ookiserya, atthu yaarowa okhala oothipelela, owiisoona, oosiveliwa itthu sa vathi ohiya opatthana ni Muluku, atthu ahinaataaniheya, oowootherya akhw'aya, oohisumaaliha, ni oowaanyokha ale ooreera murima (Mwaakameliwa), moone; yooneyaka ntoko oothunku, masi ekhoottaka Oowerya waya nave; awo muheettaneke. Okhala wira ala t'a enamuna ankela etthoko

ni etthoko, khuyaakuxa athiyana ookhweya murima, athiyana ookhweya murima aneettihiwa ni soowunlela sa khula enamuna, ahinkhalakhala yiixuttaka wala ahinkhalakhala aphiyeryaka osuwela Ekeekhai.” Nnakhala! Awo khiyaarowa ophiyerya, ni khanrowa ophiyerya. Muluku ohimmye siiso.

Ni, mFarisi oohoona, khamunwerya woona? Nkinanariwe; kinkhomakela epereku paahi ni okhuna ekhomo. Nnakhala ikereja khasinsuwela Ela. Athiyana khamwerya osuwela saana. Awo ahaana... “Athiyana ookhweya murima, aneettihiwa ni soowunlela sa khula enamuna,” Hollywood, ni inamuna iya sothene sa ithu, maihi oometthiwa, yaawaraka akaputtula, yiipintariki wiitho, inamuna sothene iya sa ithu, ekhanle yoochittittimiheya. Mwaahisuwela wira muthiyana oniira epantte yuulupale mahiku ookiserya?

¹⁶⁶ Moosuwela wira Bibilia oohimya, wira, “Ale anrowa otthyawa ehukumu ila yuulupale anookhala yoophuwa yooreera ohoolo w’Apwiya”? Nihiku nlo kinoorowa ophiyerya yeeyo, Apwiya yatthuna vale, wa yeeyo, wa nyuwo athiyana. Wira musuwele etthu Muluku onimuupuwelelawe muthiyana tthiri onrowa otthyawa ehukumu ila ya nihiku nla. Ohimmye wira “Owo aamukhala ooreera.”

¹⁶⁷ Kaahimwiiwa muthiyana mmosa, nihiku nlo, atheyaka... Mwali, nikhuru na athiyana epwitipwiti nuusu, ni olakeya wookhuruwa onvikana mwa—mwalapwa muthiyana, emutheyasaka muthiyana mmosa mutokweene a evestiitu yoorakama. Nwiriyaane va, nyuwo mwamuthiyana oohononeya, owo ohaana etthu nyuwo muhinsuwelanyu. Owo ookhalana olakeya. Nyuwo hata khamunsuwela nsina nlo exeeni. Nyuwo mpwetenxe voollilini va mwaana, ohalela. Nyuwo hata khamunsuwela ovirikana wa yooreera ni yootakhala; owo onnisuwela. Owo ookhalana etthu yooiipithihiwa mmurimani mw’awe nyuwo muhinsuwelanyu etthu ya yeeyo. Nyuwo ehoopweteyani; khimunkhalakhala mphwanyaka. Muhimwiithaneke a enamuna ya khalayi, ni sikina, siiso. Owo onnisuwela etthu nyuwo muhinsuwelanyu hat’etthu ya yeeyo. Owo orina yowiiipithihiwa mmurimani mw’awe, muhakhu wa olakeya. Nyuwo khamunsuwela nuulumo nimosa na yeeyo. Ame anyu yoolenleni siiso. Pastore anyu orootthuniherya; eyo enooniherya mukhalelo awe. Kinlaleya sa yoowo va naanaano. Munnona? Munnoona vatthu varyaanyu, ikereja?

¹⁶⁸ Yesu ohimmye wira, “Yoolempwa ela yothene ehaana omaliheriwa.” Ni ennimaliheriwa.

¹⁶⁹ Nwehe, “Ntoko Yane ni Yampere yaamuvaanyinhe aya Moise,” owo onimoorwa vamosa, akina aya. Kahi, vano, owo khonaahimya aMetotista, aPatista, va; awo ari ota wa muupuwelo. Munnona? “Masi ntoko Yane ni Yampere yaamuvaanyinhe aya Moise ni Aroni, siiso-tho awo

anoovaanyiha; athu oopahuwa akhili vanaasiwa Ekeekhai," oopahuwela makano ni miixuttiho sa ekereja, omuhiya Bibilia.

Vano nto Yane ni Yampere yaaniweryasa wira etthu p'itthu Moise aaweryawe wira. Moone, "ntoko Yampere," nkoonani elikanyiheryo vo?

"Ntoko Yane ni Yampere yaamuvaanyinhe aya Moise, siiso athu ala oopahuwa akhili vanaasiwa Ekeekhai, annivaanya Yeeyo," khandthuna Eyo vakhiviru ni yaawo, nnakhala khandthuna wiiraana ni Yeeyo, khandthuna okhala nnaata ni Yeeyo. Masi iirale, "Ololo aya onoosuweliwa." Okathi Mwaakameliwa owo onkuxaawe opuro Awe awele wirimu, onoosuweliwa, muhivela-vele; ntoko Moise, okathi aakuxale awe aana a Isarayeli, khuvava okhuma wEjitu, vano Ejitu khupwina. Vaareera.

¹⁷⁰ Yesu ohimnye wira, "Yoolempwa yothene envahiwa ni muupuxeryo, tivo Yoolempwa yothene ehaana omaliheriwa." Okathi Owo. . .

Awo yaahimukoha, khwira, "Nyuwo muniikhaliha Mmansinyu Muluku."

¹⁷¹ Owo khwira, "Nyuwo, mwa ikano sanyu yeenyu, muniwiithana maprofeta ale Masu a Apwiya jaarweenlyaya, nyuwo muwiithanne 'amuluku,' ni ti yaawo." Khwira, "Vano munwerya sayi okilamula Miyo kaahimyaka wira ka Mwaana a Muluku? Soolempwa iya sothene sinvahiwa ni muupuxeryo; yothene Ela ehaana wooniheriwa, yothene Ela ehaana omaliheriwa."

Moone vo, awo yaahikhalaxa oochoona, yaari oocalaxiwa ni moolumo a mutthu ohiya okhala oocaliwa ni Masu a Muluku. Ti yeeyo eniwiiriha athiyana wira yeeyo. Ti yeeyo enaakhaliha alaleyi wira yeeyo. Awo t'ocalaxiwa ni pixipu omuhiya Yesu. Ari oocalaxiwa ni yeeyo, ni mu—muhakhu aya, muthukumano muulupale.

¹⁷² Moone paahi sintoko ka mutthu oosuweliwa. Mwaakumihe athu, a ota wa oJeffersonville, ni nikhuru nri va n'a oJeffersonville; mwaakumihe ale a ota, wa oJeffersonville, a etapernakulu ila voosiis'ula, Nkaarowa okhalana wala nkaarowa okhalana etuusiya nuusu wira kaalaleerye. Exeeni ila? Owo onipakiwa a ipantte sothene sa elapo; a oNova Yorke, a oMassachusetts, mpakha Boston, Maine, Tennessee, Georgia, Alabama, ni mulaponi mothene. Awo anoothukumana. Amen! Ti yeeyo Owo ohimnyawe. "Onookhala Waarya okathi wa makaaripi."

¹⁷³ Awo khanwerya osuwela Waarya wa makaaripi. Owo t'uri mulattu. Owo khonsuwela tu. Owo t'ohoona. Bibilia ohimnye wira t'aryaawe.

¹⁷⁴ Ruusiya aakhenle nipuro nawe paahi molumwenkuni, mwa siyensiya, voohivikana miyaakha miloko mixexe sivinre. Moosuwela, okathi Ekhotto Yoopacerya ya Mulaponi mothene epacenryaya, awo khanatoko...Awo khiyaamucanli Ruusiya. Munna Roy...Naari nikhuru paahi n'atthu oohisuwela etthu, aSipeeriya aalupale, ireru wiitho waya wothene, ni khiyaasuvelasa ntata noolopwana ni noothiyana. Ti yeeyo, Ruusiya, masi owo khusuwela nipuro nawe. Owo aahaana wira yeeyo wira omaliherye Yoolempwa. Nyuwo munnisuwela soolaleerya saka s'eprofeta sa etthu kihimmye aka wira yaamukhumelela, moota othene aya yaarowaya otakanxana mukomunismu. Vano owo onihoolela olumwenku mwa siyensiya. Hiyo nri ottuli wawe saana. Olumwenku wothene ori ottuli wawe. Owo t'onihoolela. Owo aaroosuwela wira aahikhalana akhili, nave.

¹⁷⁵ Nwehe, mutthu orina miyoonelo thanu na mosa imosaru owo aarinaawe miyaakha ikonto thanu na mosa khalayi. Miyaakha ikonto thanu na mosa sivinre, ni miyoonelo owo aarinaawe, aanikwannya etthoko awe ya vathi ni aanimurumeela Muluku. Nto vano, mwa miyaakha miloko mithanu na miili ni mithanu sivinre, mutthu owo ookhuma vakhavaloni ni ekarosa, khukhala astronauta. Mwaha wa xeeni? Owo oroohapuwa omwaamini wawe Muluku, khuthamiherya miyoonelo sawe ni ikuru sawe ntoko mutthu. Moowehe? Owo oroohiya omuroromela Muluku. Owo oniiroromela mmansawe.

¹⁷⁶ Ntoko muthiyan'ole oohaamini. Nsina nawe ti pani, oWashington iwe, orukunxale yothene ela? [Ookhala oniira, "Murray."—Mol.] Nsina nawe ti pani? ["Murray."] Murray, owo iirale, "Vakhalaru wira nookhalana muttitthi w'anakhotto ni anakhotto a mphareya, khanimmutthuna Yehova a khalayi." Uh-huh. Nkincala etthu erinaahu.

Ti Yehova wala hat'etthu, wa miyo. Mwaahiye nakhotto ni anakhotto a mphareya esame, ni anoosama, masi Yehova onookhala mahiku othene. Vakhalaru wira ka epantte ya Yoowo, ni ya mwan'Awe, kinookhala ni Yoowo mahiku othene; kahi mwaha wo wiitthaniwa waka wala othanla waka, masi mwaha w'othanla Wawe. Amen, amen! Nkaarina naata n'iyu. Ti Yoowo! Mukivahe Yoowo ahiiso mukivahe okhwa. Maloko avenye ni amore; Yehova onookhala. Owo ohiira yeeyo, moovirani wa wakathi sothene; okathi Rooma omonre we, okathi Ejitu omonre awe, ni othene aya akina amonre aya. Ni Owo nlelo onkhala Yehova. Oh, aleluya! Kinnoona okhala natiini.

¹⁷⁷ Etthu Ruusiya aarinaawe wiisuupuwelaka, owo aahaana. Siiso ntoko Isarayeli aarinaawe orowa elapo awe. Muluku aahaana omukhanyererya Isarayeli otthikela elapo awe, mwaha wa Malope. Ni siiso Muluku aahaana omukhanyererya Ruusiya wu, mukomunismuni, wira aire voolikana ele elaleeriwe wira aamwiira.

¹⁷⁸ Mutthu ni miyoonelo sawe mithanu na mosa saarimoorwa, ekhavallo ni ekarosa, omuroromelaka Muluku. Mwa miyaakha miloko mithanu na miili ni mithanu sookiserya, owo oroohiya omuroromela Muluku. Okathi alempwe aya malamulo a Estadu Unidu ola, awo yaanimuhela Muluku mwa sothene awo yiiraaya. Vano awo kharina hata muthukumano, ni hata khanromolaka nsina Nawe. Ti yeeyo. Awo anlipana eyuulupale ya siyensiya aya, awo, olavilavi aya wa siyensiya aya; nikhuru na ithaama. Eyo ekeekhahi volikana. Olumwenku wothene ti woomiriwa mwa ohimusuwela Bibilia. Bi-...olumwenku wothene woomususa Muluku.

Masi, muupuwele paahi, varyari vene va sothene iyo, ni miromolelo sa ekereja ni ithaama sa iseminaariyu saya sothene ni sothene, Muluku ookuxa Masu a maprofeta Awe ni oomukumiha Mwaakameliwa onrowa waamini. Ohimnye wira Owo aamwiira. Owo okuminhe mwa yeeyo etthu Owo aahimmyawe wira aamukumiha.

¹⁷⁹ Awo anlipa ni osuwela waya wa mutthu, siyensiya aya a mutthu, ni sikina; aamuhiya Muluku ota, Yoowo yaatonko aya omuroromela. Estadu Unidu oomuhiya Muluku ota. Awo hata aamoomola Owo muxikola, wira an'ihu hata ehiiweke sa Yoowo. Aamoomola Owo muxikola. Vano aneererya omukumiha Owo mutoolareni, "Hiyo nimmuroromela Muluku." Anookumiha eyo munatirini wo okhala oororomeleya ni epantera, "Elapo vathi va Muluku." Anoorowa okumiha yeeyo.

¹⁸⁰ Moone, awo aronwe mwa miyoonelo saya ni iyoonelelo saya. Okhala wira, miyaakha miloko mithanu na miili ni thanu sookiserya, owo khovirikanne hata vakhani mwa miyoonelo sawe, owo nlelo mutthu mmosaru Muluku ompattunxe awe wopaceryani.

Masi, mahiku ala ookiserya, khamunwerya osuwela varyaahu? Ni ekereja yookhuma, wa Muluku, mpakha yeeyo, orowa oseminaariyu ni musuwelelo, ni sikina, ohiya Masu. Hata khammusuwela Owo mmithukumanoni mwaya, mmaxikolani mwaya, nnakhala hat'etthu, tho.

¹⁸¹ Isarayeli, mwa miyaakha miloko miili ni mithanu sivinre, oosuwela wira etthu emosa ehaaruha elapo aya, ntoko saalaiheriwaya. Awo khansuwela moota yiireiye aya eyo. Awo aahaawasa wa sothene, okhwela waamini, vathi va Malope ale, masi awo arisa elapo aya. Awo khansuwela mwaha wa xeeni.

¹⁸² Ruusiya ovenyenle-ni? Ilapo sivenyenle-ni? Xeeni mutthu akelaka owerya wira etthu? Okathi ansiyensiya, miyaakha imiya tthaaru khalayi, nasiyensiya mmosa muFaransa aamupirixinxe poola mwa eyaakuvelo emosa veelaponi, ni khooniherya, ni othokosa wa siyensiya, "Mutthu aaphiyenrye-ru opaka eyaakuvelo yowoopiha ya ikilomo miloko mixexe ni thanu na xexe ewoora emosa, elemelelo yaammukumiha mulaponi;

vootthariha ni orulela wawe, vootthariha olemela wa poola.” Vano owo onrowa imiilya ikonto muloko ni thanu na piili khula ewoora, moone, nlelo atthunaka orowaxa ottaiwene. Owo osuwenle eyo, naanaanoxa. Mwaha wa xeeni? Ehaana okhala siiso.

¹⁸³ Vano, ekereja yaanikhalaka vamwala va Yesu Kristu. Voohicala etthu mutthu aahimyawe, awo yaakhala voolikana ni Masu ale, mutthaka wa ewoora; Luteru, Wesley, ni akina iwe. Nto vano awo aatthikela ilimalelo. Yiirenle-ni yeela?

¹⁸⁴ Miyaakha miloko miili ni mithanu sivinre, Isarayeli oosuwela wira awo ari elapo aya mwaha wa etthu. Yaahilaleeriwa wira yaahaana othukumanyiwa-tho; Hoseya ohimye siiso. Hiyo noosoma yeeyo okathi ovinre. Muluku anikhaliherye osuwela saana! Vaareera.

¹⁸⁵ Okathi ene yoowo, Mwaakameliwa oosuwela Waarya wa makaaripi, oopacerya osuwela. Apentekosite oovoliwa etala aapacerya osuwela wira mitthenkeso iyo khasirina hata etthu awo yaaphavelaaya, iyo siri soovirikanyiwa ni soohononeya. Moone, ola okathi wo osuwela, osuwela. Muhaana osuwela.

Olumwenku woosuwela. Ilapo soosuwela. Siyensiya oosuwela. xetwani oosuwela wira okathi owo onweryawe waahonona athiyana, ohonona ekereja, waahonona atthu. Owo oosuwela.

Ni Muluku oosuwela wira aakhala atthu mulaponi Owo aathomenle awe Ekumi. Owo oosuwela wira ola okathi w’oveleeliha Mutthaka Awe. Owo ohiira eyo. Atthu aasuwela Yoowo, okathi wa Mwaakameliwa woosuwela Waarya wa makaaripi.

¹⁸⁶ Vaakhanle wira Sotoma aahisuwela mahiku awe, okathi owoonalyawe anamithaka ale okhuruwela weiwe, ntoko Billy Graham ni Oral Roberts!

¹⁸⁷ Vano, mutthu khata nathaama oPhoenix oroovenya khwira . . . khurumiha epantte ele mu—mufiitani, ni khuhimya wira miyo kiroohimya va, wira “kihaana opatisiwa ni Nsina na Yesu,” khuhimya yeeyo. Vano nto khwira, “Vano nyuwo moone va, va owo khwira . . .” Okathi waalavulaaka sa wAfrika, moota yaapatisaya imaara tthaaru oroihela ohoolo, ni ottuli. Khwira miyo kiirale, “Khivanvirikana hata vakhani.” Moone, owo khaaruminhe epantte ekina ya efiita; epantte yeeyo paahi, khuttihi.

Yeeyo, yaarowa okhala mulattu wo otthukeliwa wira yeeyo. Ifiita siri ni ihaakhi sa omwaneene voomalela. Ohikhale ontapanya seiyo. Vanreerela nnari. Nyuwo—nyuwo—nyuwo mookhalana malamulo mwa nyuwo. Masi hiyo naamwiira? Nnari. Owo iirale, “Mwaahiye mmansaya.” Muluku ookileela etthu enrowa okhumelela. Nwehe paahi, munwehaxaxe mutthu uwo. Munnona?

¹⁸⁸ Okathi ene yoowo, Mwaakameliwa oosuwela Waarya wa makaaripi.

Vaakhanle wira Sotoma aahisuwela ewoora awe!

¹⁸⁹ Vano, mutthu ene yoola aahenle mufiitani, khwira, “Nkawehani va, wa nyuwo atthu aPentekosite,” khwira, “ni nyuwo aPatista. Mulopwan’ola, profeta oowootha, William Branham,” moone, “ohimnye wira Oral Roberts ni Billy Graham yaarisa oSotoma.” Moone, vano khuttipiha efiita; yeeyo tu, moone.

Khaatthikenle ahimya, wira, “Awo yaari anamitthaka a oSotoma.” Kahi oSotoma, “Awo yaari weiwo ntoko anamitthaka a oSotoma.” Khula mutthu onnisuwela wira miyo kihimnye yeeyo. Murumihe efiita anyu.

“Ole onrowa okumiha wala waacererya, yoowo onookumihiwa mwa yoowo.” Awo Masu a Apwiya. Awo ankhala siiso.

¹⁹⁰ “Vaakhanle wira Sotoma aahimusuwela namitthaka awe, owo aamukhala eemenle olelo,” Yesu iirale, owo aasuwenle enamuna emosaru Abrahamu aasuwenlyawe.

Abrahamu aahisuwela wira aahikhala mwaana aalaiheriwe aarwa. Masi owo aanisuwela wira waahaana okhala orukunxiwa mwa enamuna khata, okhala wira owo khaareere wuuluvala, ni Saara nave. Masi vamoonalayawe Ole aawerya olamula miyuupuwelo sa Saara, ottuli Wawe, owo aahisuwela okathi aakhawale. Owo khwira, “Pwiya’aka, mukihiye kiruuhe maasi vakhani va kirapihe inawu Sanyu.” Awo yaahikhuurasa mukatthe mwaamukhaani. “Mukihiye koovekeleni Nyuwo, mukhale-tho okathi vakhani,” moone, va, “P-w-i-y-a aka,” ileetera suulupale P-w-i-y-a, “Elohim.” Owo ahisuwela wira Muluku aalavula ni yoowo mw’erutthu ya mutthu. Owo aahisuwela ethoonyeryo awe, ni ahireerihiwa ni Apwiya.

Sotoma khaasuwenle nihiku nawe, nto khupahiwa. Yesu ohimnye wira, “Ntoko saaryaya nihiku nle, siiso enookhala okathi Mwaana a Muluku oryaawe . . . ahiiso Mwaana a mutthu oniisooniheryawe.”

¹⁹¹ Vano, ekereja khesuwenle nihiku naya. Ntoko Isarayeli, okhanyereriwe otthikela oPalestina, eyo enoorowa okhanyereriwa okela Mmwaataanoni wa Ikereja sa Mulaponi. Mwaha wa xeeni? Eyo khesuwenle ewoora aya. “Atthu, mukhume mwa yoowo, muhaataane ni etampi awe!” Mutthyawe, ekumi anyu, ahiiso munoovariwa ni ekanyeryo ya nxeni ni khamunrowa owerya wira etthu ekina mwaha wa yeeyo.

“Ole ootakhala eetteleke otakhala wawe murima nlelo. Ole ooreera murima,” kahi *onookhala* ooreera murima, “ooreera murima naanaano va. Ole ooreera murima,” kahi bab- . . . muthiyana a maihi ookhuveya; owo khokhanle okhalaka. Vano,

eyo enkhala ntoko yootepexa, masi eyo ti Yoolempwa. Bibilia onihimya wira, “Owo khonttittimiha muru awe,” ni muru awe t’aiya awe. Muru aya ti Kristu, tivo owo khommuttittimiha Kristu. Onwerya sayi okhala “oohittittimiha” khuhikhala “ootakhala”? “Ole orina maihi ookhuveya akhalaneke. Mulopwana, muthiyana onaawara akaputtula atthikeleke waawara. Ole onkhoota Masu atthikeleke akhoottaka Yaawo.”

“Masi ole ooreera murima eetteleke oreera murima nlelo. Ole okhanle naxariya eetteleke exariya nlelo; Masu a exariya a Muluku, Mwaana a Muluku owooniheriwa. Mukhale ooreera murima nlelo, naxariya nlelo!” Moosuwela! Ayo, mulopwana! Mahiku kahi. . .

Ekereja khesuwenle nihiku naya.

¹⁹² Ntoko Isarayeli, otthikelaka muttethe awe wa natiri, owo khonsuwela moota ophiyalyawe iwe. Owo orooheliwa iwe tu voohiwehererya. Mwaha wa xeeni? National force siroomuhela voopuroni vawe.

Vano kinrowa ohimya etthu. National force soomuhela Isarayeli elapo awe; national force sinoohela ekereja Mmwaataanoni wa Ikereja sa Mulaponi; masi owerya wa Muluku onimwaahela atthu mwa Mwaakameliwa. Olumwenku onkhanyererya epantte *ela* nno, ni olumwenku onkhanyererya epantte *ele* iwe, masi Muluku onkhanyererya osulu. Erooho ya Muluku, akhanle Masu a Muluku, “Masu Aka ti Erooho ni Ekumi,” enoorowa omuhela Mwaakameliwa voopuroni Vawe. Okhala wira, Owo onoosuwela opuro Awe Mmasuni, nto Owo ori mwa Kristu, onoomuhela Owo voopuroni Vawe. Khiyaavo hata national force enrowa wira eyo. Masi national force yoomukakha Isarayeli orowa elapo awe; national forces sa Mwaataano wa Ikereja sinookakhela khula mutthenkeso muhina mwa yoowo; masi Owerya wa Muluku onoomuvenxa Mwaakameliwa okela Movuwani, okhuma-mo.

¹⁹³ Oh, atthu, musuwele nihiku nanyu, ntoko Yesu sooloponlyaweni; ethoonyeryo ya oSotoma, ni mikhalelo sa ekereja ya nihiku nla.

¹⁹⁴ Nkawehani etthu Owo ohimmyawe wira yaamwiiraneya nihiku nla. Nwiriyanne saana. Ethoonyeryo y’oSotoma yaamwiiraneya mwa nihiku; ethoonyeryo ntoko Abrahamu, nihiku nle ohoolo wa oSotoma, naaitthaneliwe okhuma. Itthu iya sothene saalaleeriwe, sinrowa okhumelelaka vano. Nwehe nihiku munkhalanyu. Noosoma eyo imaara sinci-ene.

¹⁹⁵ Vano Owo oolaiherya wooveleelihani Waarya wa Wirimu, wira ottokotthihe Masu Epyo yaarowa waaliwa nihiku nla. Epyo eri *Vaava*. Epyo ti Bibilia. Mwaha wa xeeni? Yesu ohimmye siiso. “Masu ti Epyo mulipa-oowaala aanle awe.”

Nto, vano, muhinatthi okhalana khula ohepha, voohicala vakhala wira munaala epyo, ohaana okhala waarya wira

ottokotthihe epyo eyo, ahiiso enimunta ni khenrowa oreerela etthu; enoopweteya. Masi yakhala epyo mutthayani, etthaya yooreerela, ni enamuna yooreerela ya waarya wa nsuwa mwa yeeyo, ehaana ottokottha.

Ni Owo aahilaiherya wira mahiku ookiserya, okathi wa makaaripi, Mwaana aamukhuma wira attokotthihe Epyo eyo. Epyo enoolaleeriwa. Mwaana a Muluku ontokotthiha Epyo yeeyo, alipiheryaka Yeeyo, aimihaka Yeeyo ohoolo wanyu ni ooniheryaka wira Eyo ti yoolikana. Munniwa? Musuwele nihiku nanyu.

Kinoomaliha vano. Ola okathi vano wo omaliha.

¹⁹⁶ Ni Lawotiseya thaaciri, oohoono, oosoma aamukumiha Masu eriyari awe. Awo ahiira? Owo ohimnye wira yaamwiira.

Ntoko maprofeta a khalayi yaaveleelihiwe wira alipiherye Masu oolaiheriwa a nihiku naya, wira atthu yaatthomeliwe, nihiku naya, yaahoono Yaawo. Ntoko muthiyana veehimeni, ntoko Natani, ntoko Partimeyo oohoono, ntoko Petru, ni akina aya yaasuwenle Yaawo. Owo aari Masu yaawo. Ni okumiherya, “Kaahivareke miteko Atithi yaalaihenryaya wira kaamwiira, weeso muhikaaminiki. Masi kaavaraka miteko, munaamwi muhikaaminiki Miyo, mwaamini miteko seiyo. Iyo sinnoohimeeryani Miyo k’ani.” Munniwa? Vaareera, muhialele woona nihiku, ooveleelihiwa. Alopwana n’athiyana a mahiku makina yaahimusuwela Owo, nto khuvolowa khukhala oolipa.

¹⁹⁷ aPentekosite, oh, wulu, muhinsuwelelani nihiku nanyu? Musuwele nihiku na makaaripi. Nri va, ni nri va, wira, nilipiherye orwa wa Kristu, wira nilipiherye. Hiyo niri woomalelani. Musuwele nihiku nanyu.

¹⁹⁸ Koosuwela wira nkireere woopisihani. Ewoora yanamuloko ni piili vano. Masi, okisivela Yolya ela, Ela Ekumii. Ti yeeyo. Ti, wa mulipa-oowaamini. Musuwele nihiku munkhalaanyu, ni ethooneryo ya okathi.

¹⁹⁹ Moone vatthu itthu sothene siriyaya: Isarayeli; vaavo ekereja; vaavo oohifayi; vaavo Mwaakameliwa omphwanyaneyawo. Exeeni ehanle? Etthu enttharelana, omuroiha osulu Mwaakameliwa. Vekeekhai, khula ekereja enliplelela etthu yuulupale. Ya Pentekosite eniira, “Avuwihwe Muluku! Nnimoorwa nihiku anrowaaya wira *ela*, ni anrowaaya wira *ele*.” Moone, awo anamahimya. Awo annaamini.

²⁰⁰ Ntoko, emaara emosa, Kaifa iirale, “Kahi yoolikana mutthu mmosa okhwa, ni kahi elapo yothene opweteya?” Owo aari namukuttho muulupale, Bibilia ohimnye wira, etthu owo aahimenryawe yeeyo. Owo aahilaleerya, ahisuwelaka etthu aahimyaawe. Masi owo aahisuwela ekeekhai y’ekeekhai ya yeeyo, wira owo aanvaha mukuttho Muluku ene yoowo aahimyaawe wira aari namukuttho awe muulupale?

Ti siiso, olelo! Awo anoowehererya, nipuro nlo, wa o—okathi muulupale onrwa.

²⁰¹ Vano, miyo kinnirowa vamuthukumanoni w'Alipa a Nakoso ni yaawo. Awo aniira, "Avuwihiwe Muluku!" Alaleyi ale anoovenya ni anootannya muttitthi paahi, ni aniira, "Onimoorwa muhakalaliho muulupale. Ntata n'Apwiya ninrowa okhala mulaponi!" Ni moota atthu anrowaaya, atthimakaka ntoko... Ni khansuwela wira eyo eri vathi va Malope a Isarayeli. Xeeni awo wiiraka yeeyo? Okhala wira awo aKristu aniihimya, nave khansuwela. Hata Kaifa khaasuwenle etthu iiraawe. Ni awo khansuwela wira anookhootha Mutthaka ene yoowo aveleelihiwaya. Amen!

²⁰² Ipantte sothene sa Yoolempwa, hiyo ninnisoma nihiku ti nihiku, ni esumana ti esumana, mpakha ekhanlyaya Ekeekhai voohivaanyiheya. "Alipa-oohoona yaahiweraye waakhela Yoowo," Yesu ohimnye wira, "mwaahiye mmansaya. Mulipa-oohoona amuhoolaka mulipa-oohoona, othene aya anoomorela mulittini." Nkisuwenle liini, nkisuwenle vayi, masi koosuwela wira enimoorwa.

²⁰³ Moosuwela, kinnoona mwaha wa xeeni Satana ahaatthunawe wira kiire yeela. Nsana, kaahoono ohikhala saana. Nkaawerya waakhela nnakhala Nuulumo nimosa okhuma wApwiya. Kaahiira sothene kaasuwelaaka moota wo wira, nave nkaawerya. Ni voosiis'ula, vavennye aka... Kiroomulya nakhuwo vakhani, nsana, ni aakhala ntoko aarimweemela vale munipwiipwini mwaka. Nkaareere owereiwa, miyo paahi—miyo nkaawerya saana ela. Miyo khuupuwela, "Mulattu ene exeeni tthiri? Kinoorowa mpakha weiwe, ni nkinsuwela enrowaaka ohimya. Ni, Pwiya, nkinwerya hata ophwanya Yoolempwa emosa mmuruni mwaka, wira kilepe. Nkinwerya ophwanya etthu." Miyo nkaasuwela tu etthu yo wira.

Nto, nuumala Mutthaka opacerya okirweela, Satana khukhala iiraka, "Khamunreere ohoona saana. Muru anyu onooowereya. Munooowereiwa. Khamunwerya orowa iwe. Khamunwerya weemela iwe. Enimwiireya *ela*, enimwiireya *ele*."

²⁰⁴ Kinnuupuwela, emaara emosa, ehantisi emosa ya mulipa-ookhala mmosa a mutheerye woohaawiwa oInklatera. Owo aari mutthu pure paahi. Ni yaahimmwe wira mwe—mwe—mwene, mmosa wa mamwene mahiku a khalayi aavolowa mwawe—mpaani mwawe mwa mwene. Nto, ola, owo khaarina hata mutthu... Owo aahikhalana mutthaka aarinawe oveleeliha, mutthaka wowaakuveya, mwaha wa nwanani. Nto siiso owo—owo—owo khumwiirela mwaapar'ola mwaamukhaani eemenle vale, owo khwira, "Va, mukuxe mutthak'ola, mukuxe mutthak'ola! Mwaakuvele ni—nipuro *khata-khata*, ni mwarume

wira *ela* yiiriwe.” Ni owo khwira, “Mukuxe ekopo aka ya omwene mmatatani mwanyu. Eyo enimoolipiheryani, wira miyo ki. . . nyuwo murummwe ni miyo.”

205 Vano owo khuhela vathi va nlaya nawe, vano khurowa. Makwarta mapuro othene emweemexaka, othene akina. Ekhuwelaka, “Muhapuwe! Kookhalana mutthaka wa mwene.” Amen. “Miyo ka namitthaka a mwene,” nuulumo noolipiheriwa.

206 Miyo khuupuwela, “Satana, mukhume mphironi mwaka! Kookhalana Mutthaka wa Mwene. Kihaana orowa.”

207 Emaara emosa okathi iiviwaawe Mukhulupale a Murettle, khimuhela Owo mmahiye, khutthuka mahiye, nto okhwa khunvarelela mahiku mararu othana n’uhiyu. Masi voosiisu wa Paasikha Owo aahikhalana ekopo mmatatani mw’Awe, khukhuwela, “Khumani, okhwa! Khumani, mahiye! Mutthukule! Miyo ka Mutthaka wa Mwene. Kihaana okhuma wira kilipiherye ohihimuwa nno. Miyo ki ohihimuwa ni Ekumi.” Aleluya! Kinnoona saana vano.

Owo Mutthaka wa Mwene. Nrowe nisuwele Yeeyo, apatthani, maana hiyo niniitthaneliwa othukumanela oruma wa Nlope. “Tthiri Nlope n’Apwiya ninooruma, vano khivanrowa-tho opisa.”

208 Owo aahimuthukumanya Isarayeli. Mahiku mararu, mmurotoni mwaya Owo aahimye wira aamwiira. Miyaakha ikonto piili ni imiya thanu na piili saahivira. Nihiku nlo naneeraru Owo aahimye wira aamwathukumanya vamosa, nto Owo aahiira. Owo ohimye wira aamusuweliha ephiro y’Ekumi. Eyo eri vo, elipelelaka paahi vano wira Mwaakameliwa akhume ohoolo wira awo awerye orwa, maprofeta aili, Maprofeta aHeperi, anrowa osuwela.

209 Nyuwo munnuupuwela okathi waaphwanyaneyaaka oCairo, wira kirowe weiwe, okathi Lewi Pethrus iiralyawe, “Munna Branham, awo yaatonko woona eyo. . . Awo aniwaamini maprofeta aya.”

210 Miyo khwira, “Etthu yooreera wa miyo.” Munnoona moota mutthu okhanlyawe? Masi munnoona mahala a Muluku? Miyo khwira, “Kinoosoma Waataana Wa Naanaano nno.” Awo annisoma Yoowo. Lewi aahaaveleliha, emilyawu ntero, iwe, Munna Lewi Pethrus a oSuweesiya. Awo yaamusoma Owo, erwaasaka okhuma mapuro othene iwe, aYuta ale; kahi ntoko nikhuru nla na vano n’aYuta, masi elapo aya. Nto khukhuruwa, owo khwira, “Ola akhala Mesiya, nrowe nimoone owo apakaka ethoonyeryo ya profeta, hiyo ninimwaamini yeeyo.”

211 Lewi Pethrus iirale, “Munna Branham, owo p’ukathi. Owo p’ukathi.” Ookhala aakihimenrye wira—wira waamukhala p’ukathi. Miyo khuphiya saana, vakhiviru saana.

Mulopwana mmosa khurwa khukilaathi vale, Munna Arganbright, khwira, "Munna Branham, eyo yamurowa omututuxa Isarayeli! Mwaaruhe ohoolo wa Yeeyo, ni mooniherye ethoonyeryo ya profeta. Awo animwaamini."

²¹² Miyo khwira, "Pwiya, miyo kiri va, oolikana." Kivolowa mmutteeni; kikuxa musurukhu kithuma ettikitti; keemela oCairo. Khwira, "Ayo, koolikana."

²¹³ Erooho Yoowaarya khwira, "Nla khanihiyo nipuro nanyu. Ola kuhiyo p'ukathi anyu." Moone, nyuwo munimwiisaakuviha. Miyo khuupuwela, "Oh, wulu! Kihoorwa mpakha nno; miyo—miyo kinoorowa."

²¹⁴ Etthu emosa khwira, "Mweemele vaava va! Muhirowe epantte ele. Murukunuwele oHintiya. Muhirowe iwe. Murowe oHintiya, masi muhirowe nno."

²¹⁵ Khuupuwela, "Mwaha wa xeeni?" Okathi weettaaka wiithela w'epwaro, miyo khwira, "Pwiya Yesu, ela enihimya-ni?"

Vano Owo khukisuweliha. "Hata Mmalapo. Maprofeta ala ti yaawo." Ehaana okhala voolikana ni Yoolempwa. "Moise n'Eliya ahaana orwa." Ni, ohiya vo, Mwaakameliwa khonatthi okumihiwa mphironi nlelo. "Ni maprofeta ale anootthika ni anoopaka ethoonyeryo ya profeta." Eyo ti Yoolempwa. Vaavo yothene enoomaliheriwa nto, voolikana, Isarayeli ntoko nloko nimosa ninooyariwa nihiku nimosa. Amen! Waarya wa makaaripi onnaarya!

Onookhala Waarya okathi wa makaaripi,
Ephiro ya Moovuani vekeekhai
munophwanya;
Mphironi mwa maasi, ti Waarya olelo,
Oovithiwa mwa Nsina nooreerexa na Yesu.
Amiravo n'atokweene, muttharuwe itampi
sanyu sothene,
Erooho Yoowaarya vekeekhai enookela;
Waarya wa makaaripi ohoorwa,
Ti ekeekhai wira Muluku ni Kristu ari
Mmosaru.

²¹⁶ Hiyo nri okathi wa wookiseryani, mpatthani. Vano nto ninnuupuwela esipo ela ya mulipa-oolepa oowuupuxeriwa, okathi owo iiralyawe:

Maloko anookawanyeya, (Ela iyaakha
soophiyaka muloko ni thanu sivinre.)
Isarayeli onoovenya,
Ithoonyeryo maprofeta yaahimaly'aya khalayi
ene;
Mahiku a Amalapo t'owaalakeya, (Nkawehani
soonanara saya vano.) ni oosareya woova;
"Mutthikele, yawinyu, O oomwaramwareya."

Nihiku noovuluxiwa nri vakhiviru,
 Mirima s'atthu sinoovonya mwaha wo woova;
 Musarihiwe ni Erooho ya Muluku, mukhalane
 mithuko sanyu sootthokihiwa ni sooreera,
 Nwehe osulu! ovuluxiwa wanyu ori vakhiviru.
 (Ti yeeyo.)

Maprofeta oowootha animootha, Ekeekhai ya
 Muluku anoookhoota, (Eyo kahi ekeekhai?)
 Yesu Kristu ti Muluku ahu.

Awo khanaamini Eyo. Awo aakhalana inamuna sothene sa
 ismu ni itthu! . . . ? . . . ekeekhai. Masi profeta aahihimya, ahiiso,
 namalepa owuupuxeriwa aahihimya wira:

Ninrowa weetta vaavo arummwa
 yaanyakenlyaya.

²¹⁷ Munnuupuwela mwa yoowoona aka? Miyo kiirale, "Atthu a
 Paulo yavolowa-ru, awaka anoovolowa nave, okhala wira kiirale
 voolikana ni yoowo." Miyo kinkhala ni Yeeyo.

Ale imilyawu sene yaahittikinya matata, yiiraka, "Hiyo
 nimmumula vaavo!"

Exeeni? Musuwele nihiku ninkhalaahu, okathi onkhalaahu,
 ethooneryo ya okathi onkhalaahu. Pooti vaxiye-ene ovikana
 sinuupuwelahu. Nimosa wa mahiku awo, ole ori ota akhaleke
 ota nlelo. Ole ori muhina ohaana okhala muhina mahiku othene
 nlelo. Mukhora onoowaleya.

²¹⁸ Yaakhanle-ene akina va voosiis'ula ahinatthi ovolowa nlelo,
 oh, mwa Nsina na Yesu, atthu aka oophentiwa . . .

Muhinwehe murumeyi ola oohisuwela, eemenle va,
 oohisoma, oohisuwela etthu, oohixuttihiwa; muhiwehe yeeyo.
 Masi nwehe Masu anooniheriwaka. Nwehe Erooho Yoowaarya
 yuulupale Yeeyo enlipiherya wira Eyo Ekeekhai. Hiyo nri okathi
 wa makaaripi. Vahooxa ovikana sinuupuwelanyu. Muhi . . .

²¹⁹ Athiyana, muhiye maihi anyu yinnuwe. Murokor'aka, xontte
 mukumihe ikuwo iyo soonanara. Mwaarihe asikaro awo. Okhala
 wira ewoora enimoorwa, yeeyo, "Ole ootakhala eetteleke
 otakhala wawe murima nlelo; ni ole oneettela exariya, eetteleke
 exariya nlelo. Ole ori muhina ori muhina; ole ori ota ori ota."
 Okerekhere, okhaani woophunyeya, "Vakhala wira naxariya
 ti woomurikela woopowa, ti vayi natampi ni ootakhala," ale
 ankhoota Ekeekhai, moosuwela, "anrowa ophwanyaneya vayi?"

Nrowe nuuramihe muru.

²²⁰ Vano, moWaaryani wa okathi ola onkhalaahu vano, Waarya
 wa nihiku onkhalaahu vano; ooreeraxa ni oophentiwa, nyuwo
 munkhuma istaatu soohiyana-hiyana elapo yothene, nrowe
 vano, ni miyo ni nyuwo, waltaari va, nrowe nitthokelele. Erooho
 ya Muluku eri sayi mmurimani mwahu olelo? Muupuwele, ti

Erooho yeeyo, yoohilamuliwa, yoohipahuwa; khula mwiixuttiho wa ekereja, ni sothene, soolakaseya voomalela.

²²¹ Nyuwo khumwaarowa weererya waacererya Eyo wala okumiha-Mo. Okhala wira, mweererya—ru ohela otaphulela mwa Yeeyo, yeenyu, mpantte anyu onookumihiwa Multiivuruni mwa Ekumi. Nyuwo muneererya ohimya etthu Erooho ehihimmye aya? Nyuwo muneererya okhaliha Eyo ntoko wira ehimmye etthu? Wala, munkuxa paahi ele Eyo ehimmye aya, ni munihiya Ela siiso? Nyuwo munoorehererya, munoothikila, munookaravari, mwiiraka itthu sihikhanle sooreera? Munniiraka?

²²² Muniira, “Ahe, nkinoona wira kaahaana wira *ela*. Wala, khino, miyo—miyo—miyo koosuwela wira ekerej’aka khenaamini Iyo. ‘Nlo nuulumo na mutthu mmosa paahi wa Yeeyo.’”

Mutthu owo ti Muluku. Bibilia va onihimya wira khimwaakhanle ometthaka maihi anyu. Ala . . . Bibilia ohimmye yeeyo. “Enimwiiraneya wira athiyana anrowa owaraka ikuwo ntoko alopwana, ni moota yaarowaaya okhala yoonanara wa Muluku.” Moota Erooho Yoowaarya elavunlyaya mwa ela, mwaapu ula woowiiyeviha, woohiphwanela yiiraneieye okhala ophwanyaneyaka okathi Mwene muulupale iiralyawe, “Va ari mahiye Aka, Masu Aka.” (“Va eri Ekopo Aka,” kiireke.) “Mukuxe Ekopo Aka, murowe, muruue Mutthaka.”

²²³ Miyo koosuwela wira miromolelo siheererya weemexa Owo, ni wiikara Yoowo, ni woomola Yoowo, ni okumiherya ota, n’itthu sothene. Masi, ni mahala a Muluku, miyo kiri mphironi, kikhuwelelaka elapo ni elapo, nipuro nnipuro, ekereja ni ekereja, “Mukhume-mo!” Ti woohitthuniwa, masi Eyo Ekeekhai.

²²⁴ Munnitthuna waakhela Yaawo mwa e—mwa e—mwa Erooho Awo alempwe aya? Munnitthuna waakhela Yaawo mwa Erooho avahiwaaya? Vakhala wira nlelo khimunatthi. . . Khanirina opuro wa altaari; murima anyu ti altaari. Munnitthuna ovenxa ntata, mwiire, “Muluku, mukimorele ikharari. Mutthuniherye Erooho ya Muluku ekele mwa miyo, ekipwapwelaka vano mwaha wa itampi saka sothene, ni ithepyeliwo, mihapo saka sothene soonanara, ni iviruwelo suulupale, ni onyakulihana, ni ikhotto, ni ivitikavitika, ni itthu sothene kiniiraaka. Ni koosuwela etthu, wira erooho aka khereerenle Wirimu. Mukikhalihe ooreerela murima, Pwiya, okathi ola wookiserya. Ola pooti okhala mutthaka wookiserya kinrowaaka wiiwa. Ola pooti okhala okathi wookiserya onrowaaka wiiwa Mutthaka. Miyo kinvenxa ntata naka. Muluku, mukimorele ikharari.”

²²⁵ Muluku ooreeriheni. Matata ituusiya sene. Vano, okathi vakhani paahi wa nivekelo noomaala mwaha wa nyuwo. Nyuwo nvenxale ntata, enooniherya wira nlelo munnicaliwa. Enooneya wa miyo ntoko wira Erooho nlelo enimwiitthana mutthu.

226 Muluku Oophenteya, Nyuwo Ole onsuwela itthu sothene. Ni Nyuwo mpanke itthu sothene mwaha wa niwoko na itthu sothene, okhala wira, akina yaahaana olamuliwa, akina yaahaana okhalihiwa oohoona; akina, “ntoko mulipa-oowuupa opanke mwaapu,” ntoko Paulo sihimmye awe, “mmosa wira okhale wa nttittimiho ni mukina woohikhala wa nttittimiho.” Ole opakeliwe ohittittimiha, waari paahi wira wooniherye ole waari wira ottittimihiwe. Masi kheri mmatatani mwa Mulipa-oowuupa wira etthu Owo onthunaawe? Kehiyo ethhokiheryo yoothommwa ya Muluku, wiitthana? “Ole Owo aasuwenlyawe khalayi ene, Owo oowiitthana. Ale Owo owiitthanne awe, Owo ohaakhaliha anaxariya. Nto ale Owo aakhalinhe awe anaxariya, Owo ohaavuwiha.”

227 Khino amosa-amosa a yaawo va olelo ari ntoko mwamuthiyana veehimeni, mwa soonanara, mwa ohaamini, mwa ilemalelo s’atthu, miixuttiho soopakiwa ni mutthu. Khino emaara yoopacerya awo atonko aya wiiwa itthu iya, masi etthu emosa ehaalopola murima vootikiniha-vo. Aakhala manci-ene, matata manci-ene avenxiwe, Pwiya. Mutthuniherye wira Mulipa-oowuupa akuxe mwaapu owo naanaano va ni uupe mwaapu wa nttittimiho. Kookupali wira nookhala niwoko, Pwiya, wala awo khayaakhalakhala yiiraka yeeyo, ahiiso awo khayaarowa wiiraka yeeyo, awo khayaarowa ohimyaka yeeyo. Nlelo kinnaamini, kinaalipelela yaawo.

228 Mmutthuniherye murumeyi Anyu oowiiyeviha axonttele, Pwiya. Munitthuherye oxonttela mwaha wa yaawo, ntoko mutthu omphwanyaneya eriyari ya akumi ni ookhwa; ntoko mmosa oSotoma aaxonttela mwaha wa aSotoma, “Mukhume-mo! Mukhume-mo, mwaakuveke!”

229 Arwe, Pwiya, voowiiyeviha ni voomaaleleya wa Muluku vano, mmurimani mwaya, yiiraka, “Yesu, okhuma olelo, mpakha ohoolo, Nyuwo munrowa okhala awaka. Miyo kinnoomanelani natiri ola Nyuwo naanaano va, kiryeene va vakhaterani va vaava Erooho Anyu ekikwannyale aya. Vakhala wira Eyo yookikwannya va, nkirina y’ovirika-tho okathi ola va. Vaava va ti nipuro Nyuwo okiphwannye anyu; vaava va ti nipuro onrowaahu olakiherya yeeyo; vaava va vakhaterani yeela yaneili, ekhatera yaneeraru, yaneethanu, enakhaleru exeeni. Vaava va ti vanrowaaya olakiheriwa, okhala wira vaava ti nipuro Nyuwo mukipwapwenlyanyu, vaava ti nipuro Nyuwo mulaihenryanyu olakiherya eyo. Okhala wira hata kaakhanle ootakhala ni oottakatta, khaamukhalihiwa ootteela ntoko nakhutu. Miyo kinimwaamini Masu Anyu othene. Koolikana wira keetteke mwa Yaawo, waamini Yaawo, okupali Yaawo.

“Nto vano kiniira ela wa ovuwa wa Muluku, kisuwelaka wira ekumi aka khenreerela etthu wa miyo, khemmureerela etthu Muluku, kkenaareerela etthu anamwaattamanani aka, khenreerela hat’etthu ekina; emmureerela xetwani paahi,

okipaka miyo m—mwaatteepea, wira akirihariheke iwo, khino wira kikhale etthu yoothweelana ya mulopwana wira aweheke, khino muluku eethiru a muthiyana khata. Muluku, mukikhalihe murumeyi Anyu.” Munivahe, Pwiya. Miyo kinaavahererya awo wa Nyuwo vano, mwa Nsina na Yesu Kristu, Mwan’Inyu.

Ni muru wowuurama, ni mirima sahu.

Kinniwerya omwiiwa Moopoli aka . . .

Vaxariya-vo, mpatthani. Pooti okhala okathi anyu wookiserya. Munniwerya wiiwa Nsu nlo naamukhaani?

. . . kiitthanaka,
kinniwerya . . .

Etthu Owo oniit- . . . ? Exeeni oniwiitthanaweni, vakhala wira Moopoli anyu onniitthana? Masu.

. . . Moopoli aitthanaka,

Exeeni murinaanyu wira? Okhootta olumwenku.

Ni okuxa mwiikimanyo aka ni otthara,
otthara . . .

“Miyo nkincalaka opatiiso mwa Nsina na Yesu, Pwiya.”

Miyo kinoorowa ni Yoowo omatta,
Kinoorowa . . .

Ni Yoowo, vayi? Mmaasini, mmatta, mwa khula nipuro; empa ya mavekelo, mutankini, nipuro pi nipuro. Muthanle!

. . . orowa ni Yoowo ovira omatta,
Miyo kinoorowa ni Yoowo, ni Yoowo mpakha
wookiseryani.

Miyo kinoorowa ni Yoowo ovira
woolamuliwani,

Vakhala wira Masu ahaana exariya wala ekereja t’erina exariya.

Kino . . .

“Vakhala wira miyo kirina exariya, wala Owo t’orina exariya. Ankhili aka t’arina exariya, wala Masu Awe t’arina exariya?” Nyuwo muri nipuro n’olamuliwa vano. “Etthu enaamini aka, t’erina exariya, wala Masu Awe t’arina exariya? Kinoona wira khiva mulattu okhalana maihi ookhuveya, waawara akaputtula? Kinoona wira khiva mulatthu wira mpantta wa muromolelo?” Owo ohimmye exeeni?

Miyo kinoorowa ni Yoowo, ni Yoowo mpakha
wookiseryani.

Vano vatthu Owo onikeettiheryawe miyo
kinootthara,

Ni miyo koovenxa matata, nave, Pwiya. Pwiya, vatthu ti vatthu, Mutthaka ontharelana ori wira olaleeriwe vayi? Ti wenno, ohiy’ula, wAfrika, Alemaanya, Suwiisa? Ti vayi, Pwiya?

Vaavo Owo . . .

Vatthu ti vatthu Nyuwo onikiroihaanyu, Pwiya.

. . . miyo kinootthara,
Miyo kinoorowa ni Yoowo, ni Yoowo mpakha
wookiseryani.

Vano muuramme-ene muru.

²³⁰ Nyuwo munoorowa ni Yoowo mapuro othene Owo oniweetiheryaweni-wo? Munoorowa ni Yoowo wakathi saamalaka, athu yoolupathakani, yotheyakani, yoonyemulakani? “Miyo nlelo kinookhala ni Yoowo. Miyo nlelo kinoorowa. Kinootthikela okhala ni Nyuwo, Pwiya, khula nipuro Nyuwo munkhalanyu. Miyo nlelo kinookhala oororomeleya ni eekeekhai. Woovihani w’ekhotto, miyo nlelo kinookhala oororomeleya ni eekeekhai. Kamora vale, Nyuwo munookivenxa-tho, Pwiya. ‘Ole ompwetexa ekumi awe mwaha wa Miyo onoophwanya.’”

Tivo miyo kinoorowa ni Yoowo, ni Yoowo
mpakha . . .

²³¹ Vano othene ale ari a exariya, mmurimani mwanyu, nrowe ninvenxerye matata vano, ni murima, Yoowo.

Miyo . . . Nipuro Owo onikeetiheryawe miyo
kinootthara,
Nipuro Owo onikeetiheryawe miyo
kinootthara,
Nipuro Owo onikeetiheryawe miyo
kinootthara,
Kinoorowa ni Yoowo, ni Yoowo mpakha
wookiseryani.

Owo onookivaha mahala ni ovuwa,
Owo onookivaha . . .

Pwiya Yesu, mwiiseelele maleeso ala vano. Mwaavonihe aretta ala ni oohaaxeya, Pwiya. Munivahe, Pwiya. Mwaavahe ovonihiwa, Pwiya, mwa Nsina na Yesu.

Ni onrowa ni miyo, ni miyo mpakha
wookiseryani.

²³² Munnoona oreera vano? Munnoona wira sothene soolikana vano? Vakhala wira Owo . . .

Nlope n’Apwiya nnooruma, ni khuhikhala-tho
opisa, (Nlo ti Nlope nookiserya, vano.)
Ni voosiisu waxaaru Ohinimala, wowooneela
ni wooreera.

Nrowe niipe, othene ahu vano. “Nlope n’Apwiya naruma-ru.”
Munivahe erumelo.

Nlope n’Apwiya naruma-ru, ni khuhikhala-tho
opisa,

Nto voosiisu waxaaru Woohimala, wooreera ni
wooreera;

Ale owoopowa a mulaponi yathukumana-ru
Epantte ekina,

Waireya-ru wiitthaniwa, kinookhala-wo.

Waireya-ru wiitthaniwa,

Waireya-ru wiitthaniwa,

Waireya-ru wiitthaniwa,

Waireya-ru wiitthaniwa, kinookhala-wo.

Voosiis'ule wowooneela ni woohikhala
meeku okathi ale akhwiye mwa Kristu
anhihimuwaya,

Ni ovuwa wa ohihimuwa Wawe wira mpantta;

Okathi nto makhalelo othene ammalaaya, ni
muteko ahu elapo ya vathi omalela,

Nto waireya-ru wiitthaniwa, kinookhala-wo.

Waireya-ru wiitthaniwa,

Waireya-ru wiitthaniwa,

Wairaya-eu wiitthaniwa,

Waireya-ru wiitthaniwa, kinookhala-wo.

²³³ Nrowe nivenxe matata, niire, “Ni mahala Anyu, Pwiya.” “Ni
mahala Anyu, Pwiya!”

Vano, hiyo n'axinna alopwana n'athiyana mwa Kristu.
Nrowe nirukunuwe nivahane ntata ni mutthu ori vakhiviru
ni nyuwo, mwiire, “Ni mukhaliheryo wa Muluku, waireya-ru
wiitthaniwa!”

Waireya-ru wiitthaniwa,

Waireya-ru wiitthaniwa,

Wairaya-ru wiitthaniwa,

Waireya-ru wiitthaniwa, kinookhala-wo.

Ninlipelela exeenii?

Okathi Nlope nle...(nle nookiserya)...

Apwiya naruma-ru, ni okathi waahikhale-
ru...

(Wookela mwa Ohimala, “Okathi vakhani,
waaphila niitho.”) . . .ni wooreera;

Nto ale owoopowa a mulaponi yathukumana-
ru, epantte ekina,

Waireya-ru wiitthaniwa, kinookhala-wo.

Nrowe niipe yeeyo!

Waireya-ru wiitthaniwa,

Waireya-ru wiitthaniwa,

Waireya-ru wiitthaniwa,

Waireya-ru wiitthaniwa, kinookhala-wo.

²³⁴ Oh, khonrowa okhala otthapa! Neettaka paahi, nihiku nlo,
nto va onoorwa mutthu. “T’ani? Maama!” Amen! “Khenrowa

opisa vano.” Minuutu vakhani paahi, moorukunxiwa. Ni hiyo ninrowa okhala...okumana ni yaawo, vano ninrowa okuxiwa vamosa ni yaawo, wira nakumane n’Apwiya osulu. Oh, okathi vakhani, waaphila wa niitho. Muniira, “Va ori Munna Seward, munna mmosa mutokweene aakhalaka okereja nno! Vano, va ori Munna DeArk. Va ori Munna *Lexe*... Vano, nkawehani va, awo othene aakirukurerya! Mulattu ene xeeni? Va minuutu vakhani paahi... Koosuwela wira awo aakikhumelela. Khenrowa opisa vano. Kinrowa orukunxiwa vano, okathi vakhani paahi, okathi vakhani paahi.” Oh, ayo! Nto voosiisu oxa Ohinimala, wowooneela ni wooreera. Meeku othene a siiri... .

²³⁵ Ntoko Owo sihimmye awe, “Isarayeli, munkhalaka ntoko neeku n’oxaka, nikupetthe, ni exariya anyu yoolakaseya.” Nto sothene salakaseya-ru okela moWaaryani wa Mwaana Yoowo onvarelela sothene, amen, nto, “Waireya-ru wiitthaniwa, kinookhala-wo.” Vaareera.

Mpakha olelo ohiyu:

Mpakha nikumane! mpakha nikumane!

Hiyo khanisuwenle okathi xeeni eela nrowaaya okhumelela, apatthani. Yaahikhala ehantisi, khalayi, masi Ekeekhaii, ni enimwiiraneya. Hiyo nri okathi ene yoowo vano.

Mpakha—mpakha nikumane! mpakha hiyo... .

Ni mahala a Muluku, hiyo ninnilipelela, ewoora ya neethanu na piili ni minuutu miloko miraru ohiy’ula.

Muluku akhale ni nyuwo mpakha nikumane-tho.

Nrowe nivenye vano neemele.

²³⁶ Oh, kahi yoothamaleya? “Nla mapuro a Wirimu mwa Kristu Yesu.” Nkaarowa waakakhanya ni hat’etthu. Nyuwo moosuwela moota ohinreere aya okisivela omesa ni moota onkisivelaaya oxaya, okhala wira kinnimoona Muluku mothakoni iwe. Miyo okisivela. Masi, oh, nkaarowa waakakhanya hata minuutu mmosa ni yeela, ni misuwelelo sothene sa miyaakha imiya sene. Minuutu mmosa wa yeela, otteeliwa murima iwo!

²³⁷ Muluku, mpake mwa miyo muhakalaliho. Miyo kikhale muhakalaliho. Khula mmosa a hiyo akhale muhakalaliho, muhakalaliho mwa miyo. Mukikhalihe, Pwiya, ovoliwa etala, mukikhalihe oovoliwa ntthona. Mukhalihe mwa miyo, Pwiya, ele entthuneya mwa miyo. Miyo, okhuma ewoora ela mpakha ohoolo, kikhale Awinyu; murumeyi oowiivahereryaxa, murumeyi ooreerelaxa, ooreerihwaxa ni Nyuwo; ooweryaxa, oowiyevihaxa, ooreeraxa murima, ootthunaxa ovara muteko; oowehaxa itthu sikhanelle sooreerela, ni kiliyalaka itthu sivinre, ni soohireerela. Kitthimakele omukaanoni wa wiitthaniwa wuulupale wa Kristu. Amen.

Iwo p’utthuna wahu, kuhiyo?

Vaareera, nrowe, mpakha nikumane olelo ohiyu, nrowe
nikuxe Nsina na Yesu ni hiyo vano, khula mmosa a nyuwo vano.

Mukuxe—mukuxe Nsina na Yesu ni nyuwo,
Mwaana a mixankiho ni ooriipiwa murima;
Nlo nnimoovahani otthapa ni olipa,
Mukuxe Nenlo mapuro othene onrowaanyu.
Nsina nooreerexa, O noosivela!
Nroromelo wa vathi ni otthapa wa Wirimu;
Nsina nooreerexa, O noosivela!
Nroromelo wa vathi ni otthapa wa Wirimu.

Vano nrowe nuuramihe muru.

Mukuxe Nsina na Yesu ni nyuwo,
Ntoko Mwaakiheryo wa khula murakho;
Ottehattehiwa woorukureryani . . . 

64-0726M Osuwela Nihiku Nanyu Ni Mutthaka Aya
Branham Tabernacle
Jeffersonville, Indiana wAmerika

EMAKHUWA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org